

Cart De'en Nyoj Par Beṇə' Ebreo Ca'

*Diozən' babe'elene' chio'o dižə' ca de'en bsele'e
Xi'ine'enə'*

¹ Tyemp de'en bagwde, Diozən' bsele'e zan profet beṇə' gwsoe' xtiže'enə' len de'e xaxta'ocho ca'. Zan las profet ca' gwso'e xtiže'enə' len de'e xaxta'ocho ca', nža' nža' can' gwso'en.

² Pero tyemp nga zocho na'a nža'alə babene'. Na'a babe'elene' chio'o dižə' ca de'en bsele'e Xi'ine'enə' ben' ben yoban', yežlyon' na' de'e ca' chle'icho le'e yoban', na' beng'a'aque'en con can' ben Diozən' mendad. Na' gwžin ža catə' gaquə lao na Xi'in Diozən' yoguə beṇač, yoguə bia ca' chsa'aš, na' biquə'əchlə de'e ca' bene'.

³ Xi'in Diozən' nse'e doxen yelə' chey che'eni' che Xe'enə' na' cayaṇə'ən naquə yichjla'aždao' Xe' Dioz nan' naquə yichjla'aždaogüe'enə'. Na' Xi'in Diozən' chone' par nič yoban', yežlyon' na' de'e ca' chle'icho le'e yoban' chso'onən žin, chedə' nape' yelə' guac par nič chac con can' ne'enə'. Bsanlažə' cuine' gwso'ot beṇə' le' par nič chnĭtlaogüe' xtolə' yoguə' chio'o chonlilažə'əchone'. Na' gwde na' beyepe' yoban' zjəyechi'e cuit Xe' Diozən' ben' naquə le'ezelaogüe beṇə' zaque'e par chnabi'e txen len le'.

*Xi'in Diozən' naquəche' beṇə' zaquə'əche cle ca
angl ca'*

⁴ Na' n_la' alao de que Xi' in Diozən' naquəche' be_nə' zaquə'əche cle ca angl ca', čhedə' Diozən' bab-nežjue'ene' ye_lə' bala'an mazəchlə ca de'en bab-nežjue' angl ca'. Na' babene' par ničh naquəche' be_nə' blaoch.

⁵ Diozən' bitonə' ye'e ni tozə angl can' gože' Xi' in'e'enə', gože'ene':

Len' naco' xi' in'a'.

Neža babena' par ničh solao nabi'o len nada'.

Na' nic ne'e güe'e dižə' čhe notə'ətezə angl can' gwne' čhe Xi' in'e'enə', gwne':

Nada' gona' par ničh gacbia' naca' Xe',

na' gona' par ničh gacbia' de que naque' Xi' in'a'.

⁶ Xi' in Diozən' naque' le'ezelaogüe be_nə' zaque'e. De'e na'anə' catə'an Diozən' bsele'ene' yežlyon' gwne':

Yoguə'əlo_l angl čhia' ca' cheya_lə' əso'elaogüe'ene'.

⁷ Nach gozne' čhe angl ca':

Chona' par ničh angl čhia' ca' be_nə' ca' chso'on mendad čhia'

chsa'aque' ca be' de'en chečh na' ca yi' be_l.

⁸ Na' nža'alə can' be'e dižə' len Xi' in'e'enə' gože'ene':

Len' naco' Dioz na' chnabi'o zejlicane.

Na' lechguale güen chnabi'o.

⁹ Chebeido' de'en zda lica na' chgue'ido' de'e malən'.

De'e na'anə' nada' Diozən' ben' cho'elaogo'o

babena' par ničh zocho' mbalazəch cle ca be_nə' ljuežjo' ca'.

¹⁰ Na' de'e yoblə gož Diozən' Xi' in'e'enə':

Le' naco' Xan yežlyon'.

Len' beno'on ža gwlasda'ote.

Na' yoguə' de'en chle'icho le'e yoban', leczə len' beno'on.

11-12 Na' gwžin ža catə' te che yoguə' de'en chle'icho le'e yoban' na' yežlyo nga.

Pero le' bito te chio'; syempr soczo' zejlicane.

Na' gwša' le'e yoban' na' yežlyon' ca to beṇə' chša' xe' catə' babeyoin na' chaze' yeton.

Gono' len le'e yoban' na' yežlyon' can' chon to beṇə' catə' chetobə xe'.

Pero le', tozəczə can' gaco' zejlicane, na' bito əžin iz nacho te chio'.

13 Diozən' bitonə' ye'e ni to angl ca de'en gože' Xi'ine'enə', gože'ene':

Gwche'edo' cuita' nga nabi'acho txen,

na' gona' par ničh nitə' de'e ca' chso'on contr le' na' beṇə' contr chio' ca' xni'onə'.

14 Ca naquə angl ca', yogue'e zjənaque' beṇə' chso'on mendad che Diozən', chsele'e lega'aque' par chsa'aclene' chio'o bagwlej Diozən' par ničh žjəyezochō len le'.

2

Cheyalə' əgwzenagcho che xtižə' Diozən' par ničh žjəyezochō len le'

¹ Na' laogüe de'en naquə Xi'in Diozən' beṇə' blaoch na' beṇə' zaquə'əche ca angl ca', do yichj do lažə'əcho cheyalə' əgwzenagcho xtiže'enə' de'en babenecho, chedə' la' šə bito əgwzenagcho chei do yichj do lažə'əcho, guanlažə'əchon na' cuejyichjchon.

² Lei che Diozən' de'en gosə'əyixjue'e angl ca' naquəczən de'e žialao xen. Na' de'e na'anə' Diozən' bnežjue' castigw che de'e xaxta'ocho ca' batə'ətezə

cui bosso'ozenague' c̄hei segon de'e mal de'en gwso'on to toga'aque'.

³ Na' naquən segor de que Diozən' goṇe' chio'o castigw šə bito goncho can' na Xancho Jesocristən'. Zgua'atec Xancho Jesocristən' be'e dižə' güen juisy can' cheyalə' goncho par niç žjəyecho len le'. Nach gwdenə' beṇə' ca' gosə'ədalen le' lecə' bosso'ozejni'ine' chio'o can' gwne'enə', c̄hedə' gosə'ənezene' de que naquən güen.

⁴ Na' Diozən' bene' par niç gwso'one' miḷagr na' bichlə de'e zaquə' yebanecho, na' Diozən' bnežjue' lega'aque' zan clas yelə' guac, na' Spirit c̄he'enə' benən par niç gwso'one' de'e zan de'e güen len yelə' guac c̄hein' segon can' gwyazlažə' Diozən', par niç ənezecho de que xtižə'əga'aque'enə' naquən de'e li.

Goc Jeso'osən' doxen can' naquə chio'o beṇačh

⁵ Catə' te c̄he yežlyo nga na' gatə' yežlyo cobə de'en cho'a dižə' c̄hei, Diozən' bito gone' ca yesə'anabia' angl ca'.

⁶ Na' nyoj can' gwna de'e Rei Dabin' gože' Diozən':

¿Bixc̄hen' chacdo' c̄he beṇačhən'? ca naquə bitotec bi zjəzaque'e.

Na' ¿bixc̄hen' chaclenga'aco'one'?

⁷ Beno' par niç beṇačhən' bito zjənaque' beṇə' blao can' zjənaquə angl ca' pero caguə syempr gaquən ca'.

Bia'aczə beno' par niç zjəzaquə' beṇačhən' na' bnežjwga'aco'one' yelə' bala'an.

⁸ Beno' par niç yoguə'əloḷte de'e zjəde əsa'aquən lao na' beṇačhən',

na' len yoguə'əlol bia ca' chsa'aš, leczə əsa'aquəb lao
na'aga'aque'.

Na' ca naquə ben Diozən' par niçh yoguə'əlolte de'e
zjəde əsa'aquən lao na' beṇəçhən' na' yoguə' bia
ca' chsa'aš leczə əsa'aquəb lao na'aga'aque', de'e
na'anə' beṇəçhən' yesə'anabi'e lao yoguə'əte de'en
zjəde, la'anə'əczə n̄a'a n̄ezecho bitonə' yesə'anabi'e.

⁹ Na' ca naquə Jeso'osən', žlac goque' beṇəçh bito
goque' beṇə' blao can' zjənaquə angl ca'. Na' de'e
tant n̄zi'ilažə' Diozən' chio'o beṇəçh bene' par niçh
Jeso'osən' bsanlažə' cuine' por ni çhecho catə'an
gwso'ot beṇə' le', na' de'e na'anə' Jeso'osən' banzi'e
yelə' bala'an̄ xen na' banaquəçhgüe' beṇə' zaque'e.

¹⁰ Diozən' bene' bia chsa'aš, bene' beṇəçh na'
yeziquə'əchlə de'e zjəde par niçh chzi'e yelə'
bala'an̄. Na' bene' güen ca de'en bsi'e x̄neze par
niçh gwxaquə'əzi' Jesocristən' ben' babebej chio'o
xni'a de'e malən'. Na' de'en gwxaquə'əzi'enə' chac
chone' par niçh beṇə' zan əsa'aque' xi'in̄ Diozən'
na' žjəsyə'anite'e len le' yoban'.

¹¹ Jeso'osən' bagwleje' chio'o par naccho lažə'
na' Diozən'. De'e na'anə' txen len le' naccho xi'in̄
Diozən' na' bito cheto'ine' par əne' che chio'o de
que naccho beṇə' biše'e na' beṇə' zane'.

¹² Quinga gwna Jeso'osən' gože' Diozən':

Gua'a dižə' par niçh beṇə' biša'a ca' na' beṇə' zana'
ca' yesə'ənezene' non' naco'.

Na' lao zjəndopə zjənžague' chso'elaogüe'e le',
nada' gua'a dižə' ca beṇə' güennə' naco'.

¹³ Nach gwne':

Sotezə soa' gonlilaža'a Diozən'.

Na' de'e yoblə gozne':

Nga zoa' txen len beṇə' ca' beṇ Diozən' nada' par niç zjənaque' xi'ina'.

14 Na' chio'o naccho beṇə' belə' chen, chio'onə' naccho xi'ine'. De'e na'anə' lecəə le' golje' goque' beṇə' belə' chen na' bsaṇlažə' cuine' gwso'ot beṇə' le' par niç bñitlaogüe' yelə' gwnabia' che gwxiye'en de'en chon par niç chatcho.

15 Bene' par niç chio'o chonlilažə'əchone' bitoch žebcho gatcho. Beṇə' ca' cui chso'onlilaže'ene' syempr chəsə'əžebe' sa'ate'.

16 Jeso'osən' bide' yežlyo nga caguə par goclene' angl ca', sino par goclene' beṇə' ca' chso'onlilažə' Diozən' can' benlilažə' de'e Abraanṇə' Diozən'.

17 Benən byen goc Jeso'osən' doxen can' naquə chio'o beṇač par niç ca' chaclene' chio'o lao Diozən' can' gwso'on de'e bχoz əblao ca' len de'e xaxta'o chio'o beṇə' Izrael gwsa'aclene' lega'aque'. Cheyašə' cheži'ilažə' Jeso'osən' chio'o na' chone' complir can' ne'enə'. Can' chon Jeso'osən' be'enə' checa'a xtolə' chio'o chonlilažə'əchone'.

18 Jeso'osən' cuat bene' de'e mal pero bžaglaogüe' catə'an gwlo'oyelə' gwxiye'en le' par gone' de'e malən' na' catə' goc bitə'ətezəchlə de'e mal len le'. De'e na'anə' nezene' naclən' chone' chaclene' chio'o catə' chgo'oyelə' gwxiye'en chio'o par goncho de'e malən' na' catə' chac bitə'ətezə de'e mal len chio'o.

3

Jeso'osən' zaquə'əche' cle ca de'e Moizezən'

1 Beṇə' bišə', laogüe de'en bagwlej Diozən' yoguə' chio'o par naccho lažə' ne'enə', cheyalə' goncho xbab che Cristo Jeso'osən' ben' bselə' Diozən' par

naque' b̄xoz əblao c̄hecho. Diozən' bsele'ene' bedətixjui'e xtiže'enə' de'en chejle'echo c̄hei.

² Diozən' gwleje' le' par chaclene' chio'o ca to b̄xoz əblao. Na' Jeso'osən' lao bide' yežlyon' na' n̄a'a chone' con can' na Diozən', ca'aczən' ben de'e Moizezən' ben' leczə goclene' yoguə' beṇə' gwsa'ac family c̄he Diozən'.

³ Pero na' Jeso'osən' zaquə'əche' cle ca Moizezən'. Jeso'os na'anə' bxie' family c̄he Diozən' ca de'en bene' par niçh chio'o chonlilažə'əcho Diozən' n̄a'a na' len beṇə' ca' gwsa'onlilažə' le' cana' naccho family c̄he Diozən'. Na' ca naquə' de'e Moizezən' ža, goque' con to beṇə' lao family c̄he Diozən'.

⁴ Na' gwnitə' beṇə' bxe to to family nitə' lao yežlyon', pero Jeso'osən' caguə' bxie' family c̄he Dioz na'azən', sino leczə bxie' yoguə'ate de'e zjəde, c̄hedə' len' naque' Dioz.

⁵ Na' ca naquə' de'e Moizezən', bene' can' gwna Diozən' par goclene' yoguə' beṇə' gwsa'ac family c̄he Diozən' la'anə'əczə goque' con to xmos Diozən'. Na' de'e Moizezən' be'e dižə' c̄he de'e ca' ze'e əsa'ac ca tyempən' de'e ca' bagwsa'aquən n̄a'a.

⁶ Cristən' leczə bene' complir can' gwna Diozən' par goclene' beṇə' zjənaquə' family c̄he Diozən'. Na' bene' ca' c̄hedə' naquə'cze' Xi'in̄ Diozən', caguə' ca to mos. Na' family c̄he Dioz na'anə' naquə' chio'o šə zotezə zocho chonlilažə'əcho Diozən' do yichj do lažə'əcho catə'an yidə Cristən' de'e yoblə, na' šə chebeicho de'en yidə Cristən'.

Guaquə socho mbalaz len Diozən'

⁷⁻⁸ Cheyalə' goncho xbab can' gwna Spirit c̄he Diozən' de'en nyojən nga:

Catə' Diozən' əne' to de'e gonle n̄a'a,
bito gacle beṇə' godenag can' gwsa'ac beṇə' Izrael
ca' cana'

catə' gwso'one' contr Diozən' latjə dašən'.

Gwso'one' prueb šə leine' de que gwnežjue' castigw
čhega'aque'enə'.

⁹ Nach Diozən' gwne':

De'e xaxta'ole ca' bito gwse'ejle'e chia' la'anə'əczə
čhoa iz besə'əle'ine' de'e ca' bena' par
goquəlenga'aca'ane'.

Con gwso'one' prueb šə leida'anə'.

¹⁰ De'e na'anə' bito bebeiga'acda'ane',

na' gwnia': “Do tyemp naquəga'aque' beṇə'
yichjla'aždao' žod,

bitonə' se'enene' se'ejni'ine' can' chona'.”

¹¹ Na' de'en bž'a'a lega'aque' de'e nan' gwnia'
čhega'aque' de que cuat nite'e mbalaz len
nada'.

¹² Legapə cudad beṇə' bišə', par ničh ni tole
cui gacle beṇə' yichjla'aždao' mal. Lesotezə leso
legonlilažə' Diozən' par ničh cui cuejyichjlene'
čhedə' le'enə' zoe' zejlicane.

¹³ Žlac n̄a'a n̄e'e de tyemp par əgwzenagle che
Diozən', legwtiplažə' ljuežjle tža tža par ničh cui
gonle de'e malən', la' catə' choncho de'e malən'
chxoayaguən chio'o par ničh cuich bi bi chaque-
cho catə'ən chonchchon.

¹⁴ Ngodə'əcho txen len Cristən' šə n̄e'e zotezə
zocho chonlilažə'əchone' catə'ən yide' de'e yoblə
con can' gwzolaoczcho chonlilažə'əchone'.

¹⁵ Na' nyoj Xtižə' Diozən' par chio'o gan' nan:
Catə' Diozən' əne' to de'e gonle n̄a'a

bito gacle be_{nə}' godenag can' gwsa'ac be_{nə}' Izrael ca' cana'.

16 Na' de'en nyojən nan ca' cho'en dižə' che be_{nə}' ca' jəsyə'ənao de'e Moizezən' catə'an jəyeleje' lega'aque' Egip_ton'. Boso'ozenague' can' ben Diozən' mendad par besyə'əchoje' Egip_ton', pero beyožzə besyə'əchoje'enə' bitoch boso'ozenague' che'.

17 De'e na'anə' bže'e lega'aque' choa iz de'en gwso'one' de'e malən' cuich boso'ozenague' che', na' gwsa'ate' latjə dašən'.

18 Na' Diozən' gwne' de que cuat nite'e mbalaz len le' chedə' cui boso'ozenague' che'.

19 Na' nezecho de que yelə' godenag chega'aque'enə' cui goquə nite'e mbalaz len le'.

4

1 Na'a ža, nezecho can' goc che be_{nə}' godenag ca' be_{nə}' ca' gwsa'at latjə dašən'. De'e na'anə' cheyalə' žebcho par nič cui goncho can' gwso'one'enə', chedə' šə goncho can' gwso'one'enə' bito gaquə socho mbalaz len Diozən' can' bene' lyebe.

2 Babenecho to dižə' güen dižə' cobə de que guaquə socho mbalaz len Diozən' ca dižə' de'en gwse'ene lega'aque'. Pero ca naquə lega'aque' de'en cui gwse'ejle'e chei, de'e nan' bito goquəlenən lega'aque'.

3 Na' chio'o chejle'echo che de'en na Diozən' bazocho mbalaz len le'. De'e na'anə' bito na Diozən' checho can' gwne' che be_{nə}' ca' gwne':

De'en bžə'a lega'aque' na' gwnia' de que cuat nite'e mbalaz len nada'.

Na' ca naquə Diozən' n̄ezecho babeyož b̄xie' yoban' na' yežlyon' na' de'e na'anə' zoe' mbalaz.

⁴ Can' nyoj to part Xtiže'enə' nan:

Xop ža ben Diozən' yoban', yežlyon', ben_achən', bia yixə'ən na' biquə'əchlə de'e zjəde.

Na' catə' bžin ža gažən', bitoch bi bi bene', con zoe' mbalaz.

⁵ Na' de'e yoblə goncho xbab che de'en gwne':

Cuat n̄ite'e mbalaz len nada'.

⁶ De'e li balə beṇə' n̄ite'e mbalaz len Diozən'. Pero ca naquə beṇə' ca' gwse'enene' dižə' güen dižə' cobə che'enə' cana'ate, bito goquə n̄ite'e mbalaz len le' chedə' bito boso'ozenague' che'.

⁷ Na' catə' bagwde zan iz Diozən' gwne' de'e yoblə de que guaquə n̄itə' beṇə' mbalaz len le'. Bene' par nič bzoj de'e Rei Dabin' dižə de'en na:

Catə' Diozən' əne' to de'e gonle na'a bito gacle beṇə' godenag.

⁸ De'e Josuen' gwche'e de'e xaxta'o chio'o beṇə' Izrael gan' gosə'əzi'e yežlyon' de'en bnežjw Diozən' lega'aque'. Pero lega'aque' bito gwnite'e mbalaz len Diozən'. De'e na'anə' gwdechlə Diozən' bene' par nič de'e Dabin' bzoje' gwne' de que gwžin ža n̄itə' beṇə' mbalaz len le'.

⁹ Nachən' n̄ezecho de que chio'o chonlilažə'əcho Diozən' chac socho mbalaz len le'.

¹⁰ Na' beṇə' ca' banitə' mbalaz len Diozən' bitoch chso'one' can' na xbab chega'aque'enə', sino que chso'one' can' na Diozən'. De'e na'anə' nacho de que nite'e mbalaz can' zo Diozən' de'en beyož b̄xie' yoguə' de'e ca' zjəde.

¹¹ Na' cheyalə' yeyiljažə'əcho nac goncho par nič socho mbalaz len Diozən'. Cheyalə' gwzenagcho

che' par ničh ca' ni tocho cui gac checho can' goc che de'e xaxta'ocho ca' de'en cui boso'ozenague' che Diozən'.

¹² Xtižə' Diozən' chazən lo'o yichjla'aždao' benə', na' chaclenən notə'ətezə choso'ozenag chei. Na' gwxaquə'əleben ca to spad de'en nlachgua chopə la'ate. Pero mazəchlə can' chon to spad chon Xtižə' Diozən', chedə' chlo'in chio'o no chein' chzenagcho, əche Spirit che Diozən' o šə che la'ažda'omalchon'. Leczə ca' chzejni'in chio'o che xbab de'en yo'o lo'o yichjla'ažda'ochon' na' che yoguə'əlöl de'en chzelažə'əcho šə naquən güen o šə naquən mal. De'e na'anə' gwxaquə'əleben ca to spad de'e chčhog entr bečhj bnia ca' na' entr bin ca'.

¹³ Diozən' neze nle'ine' to to benəch, na' to to angl, na' to to de'e xio', na' cuantzə bi de'en zjəde. Diozən' neze nle'ine' yichjla'ažda'ochon'. Na' laogüe' na'anə' əgwdecho cuent šə biquə' de'e babencho.

Jeso'osən' naque' bχoz əblao chechon'

¹⁴ Jeso'os Xi'in Diozən' babeyepə' yoban' gan' zo Diozən' par gaquəlene' chio'o. De'e na'anə' Jeso'osən' naque' bχoz əblao checho, ben' naquə le'ezelaogüe benə' zaque'e. Na' de'e na'anə' cheyalə' sotezə socho gonlilažə'əchone' can' chonczcho.

¹⁵ Na' Jeso'osən', ben' naquə bχoz əblao chechon', chache'ine' catə' chaquecho zdebə goncho to de'e güen. Gwxiye'en gwlo'oyelə'ən le' gone' de'e mal pero bito bene'en na' bžaglaogüe' cayaṇə'ən chžaglao chio'o benəch.

¹⁶ Na' cheyalə' gü'elencho Diozən' dižə' sin cui žebcho, əṇabechone' yezi'ixene' checho na'

gaquälene' chio'o batä'ätezä chyažjecho yelä'
 chaclen che'enä', chedä' le'enä' nži'ilaže'e chio'o.

5

¹ Benä' ca' besä'ächoj gwsa'aque' bχoz äblao
 che nasyon Izrael chechon' tyemp de'en bag-
 wde jso'e bi de'en jso'e lao Diozän' na' gwsö'ote'
 bia yixä' besä'älälje' xchenga'acquäbän' par niçh
 Diozän' bezi'ixene' xtolä' de'e xaxta'ocho ca'. Na'
 yoguä' bχoz ca' gwsa'aque' con to benä'.

² Na' bχoz äblao ca' gwsa'ape' yelä' chxenläžä' len
 benä' ca' cuinä' se'ejni'i can' cheyalä' so'one' na' len
 benä' ca' bazjänxoayag len de'e malän', chedä' leczä
 beñachän' zjänaque' na' naquän zdebä par so'one'
 de'e güennä'.

³ Na' de'en zjänaque' beñachän' benän
 byen gwsö'ote' bia yixä' na' besä'äläljä
 xchenga'acquäbän' par gosä'änabe' yezi'ixen Diozän'
 xtolä'äga'aque'enä' can' gosä'änabe' yezi'ixene'
 xtolä' benä' ca' yelä'.

⁴ Na' notono gwlej cuine' par gaque' bχoz
 äblao, sino Diozän' gwlejga'aquene' can' gwleje' de'e
 Ronnä'.

⁵ Le'egatezä ca' Cristän' bito ben cuine' xen
 cuejlize cuine' par gaque' bχoz äblao. Diozän'
 gwleje'ene' na' Dioz na'anä' gože'ene':

Len' naco' Xi'ina'.

Neža babena' par niçh solao nabi'o len nada'.

⁶ Na' ga yoblä nyoj yeto de'en gože'ene':

Naco' bχoz benä' zo zejlicane,

na' naco' ca bχoz Melquisedequän'.

⁷ Na' Jeso'osän' catä' gwzoe' yežlyo nga bene'
 orasyon lao Xä' Diozän' ben' gac yosle'ene' par

nich cui gate'. Jeso'osən' gwne' zižjo na' gwcheže' gwṇabe' yelə' chaclen che', na' Diozən' bzenague' na' bene' par nich yelə' gotən' cui gwnabi'an le' chedə' benlilaže'ene'.

⁸ Na' la'aṇə'əczə Jeso'osən' naque' Xi'in Dioz, Diozən' bzejni'ine' le' de que cheyalə' əžaglaogüe' par yeyož gone' yoguə'əlöl de'e ca' naquən gone'. De'e na'anə' Jeso'osən' bžaglaogüe' len yoguə'əlöl de'en goc che' yežlyo nga.

⁹ Na' beyož goc che Jeso'osən' yoguə'əlöl can' gone'e Diozən', nach gwzolao chone' par nich yoguə'əlöl beṇə' ca' choso'ozenag che', nite'e len le' zejlicane.

¹⁰ Diozən' gwleje' le' par naque' bṅoz əblao checho na' gwxaquə'əlebene' ca bṅoz Melquisedequən'.

Gapcho cuidado par nich cui cuejyichjcho xtižə' Diozən' de'en bachejle'echo chei

¹¹ Na' ne'e dech de'e zan de'en che'enda' ənia' le'e che de'en naquə' Jeso'osən' bṅoz chechon', pero naquən zdebə əni'an par šejni'ilen, chedə' bitoch chebeile gwzenagle che Diozən'.

¹² Bagolə' əgwsed əgwlo'ile beṇə' yeziquə'əchlə xtiže'enə', pero latje de'e gonle ca', chyažjele to beṇə' par əgwsed əgwlo'ine' le'e de'e yoblə ca de'en babsedle de'e nechən'. Na' laogüe de'en chyažjele əgwsedəchle de'e ca', gwxaquə'əlebele ca bidao' ca' ne'e chsa'ažə', bi'i cuiṇə' gac sa'o.

¹³ Na' ben' naquə' ca bidao' ne'e chažə', bitonə' šejni'ine' xtižə' Diozən' de'en naquəch zdebə.

¹⁴ Na' xtižə' Diozən' de'en naquəch zdebə gwxaquə'əleben ca yelə' guao de'en chao beṇə' cha'o. Na' beṇə' ca' chse'ejni'i len chsa'acbe'ine' che bitə'ətezə dižə šə naquən de'e li o šə

naquən dižə' güenlažə'. Chsa'acbe'ine' chedə' la' bazjəyo'olaogüe' choso'ozenague' che Diozən'.

6

¹ Na' ca bidao' ca' chəsə'əzolao chsa'obo' yelə' guao catə' bazjəncha'obo' ca'aczən' chio'o cheyalə' solaocho cue' yichjcho che xtižə' Diozən' de'en naquəch zdebə par nič gaquəch yichjla'ažda'ochon' can' naquə yichjla'aždao' Cristən'. Catə'an gwzolao benlilažə'əcho Cristən' gwyejni'icho can' yedinjecho xtolə'əchon' na' bedinjechon. Na' na'a bitoch chyažjən yedinjecho che de'e ca' de'e yoblə, na' nic chyažjən yezolaochogonlilažə'əchone' de'e yoblə.

² Bañezczecho bi zejen catə'an chcho'acho nisən', na' lecžə can' bañezecho bi zejen catə'an chxo na'achon' yichj beṇə' yoblə chṇabcho yelə' chaclen che Diozən' par lega'aque' na' bitoch chyažjən no gwzejni'iche chio'o bi zeje de'e ca'. Le'egatežə ca' bitoch chyažjecho no gwzejni'iche chio'o can' yolis yosban Diozən' beṇə' guat ca' o can' gone' yelə' jostis che beṇə' ca' chso'on de'e malən'. Bañezczega'aquechonṇə'.

³ Pero na'a ža, šə Diozən' güe'e latjə yeyiljlažə'əcho nac goncho par nič gaquə yichjla'ažda'ochon' can' naquə yichjla'aždao' Cristən'.

⁴ Nitə' beṇə' bachse'ejni'i xtižə' Diozən' na' bazjənape' yelə' mban zejlicane de'en chon Diozən' chio'o chonlilažə'əchone', na' lecžə ca' bazo Spirit che Diozən' lo'o yichjla'ažda'oga'aque'enə'.

⁵ Bazjənezene' ca güennə' naquə xtižə' Diozən' na' bazjənombi'e milagr na' bichlə yelə' guac che

Diozən' la'aŋə'əczə ze'e yesə'ələ'ichene' yełə' guac de'en gwlo'eche' catə' əžin ža gatə' yežlyo cobə.

⁶ Na' šə gwžinclə ža yesə'əgue'i beŋə' ca' Diozən' šə yesə'əbejyichjcle' xtiže'enə', bitoch gaquə yesyə'ədinjene' xtolə'əga'aque'enə' de'e yoblə, čhedə' lo'o yichjla'ažda'oga'aque'enə' so'one' txen len beŋə' ca' bosə'oda' Xi'in Diozən' le'e yag corozən', na' so'one' par ničh beŋə' yeziquə'əchlə leczə yesə'əgue'ine' le'.

⁷ Ca naquə yežlyo güen gan' chsa'az beŋə', šə chacchgua yejon', nach chac de'en chsa'aze'enə' na' chatə' de'en chəsə'əyažjene', na' Diozən' chebeine' de'e chac cwseš čhega'aque'enə'. Can' gwxaquə'əlebecho šə zotezə zocho chzenagcho čhe Diozən'.

⁸ Pero šə bagwlejjyichjcho cuich chzenagcho čhe Diozən' gwxaquə'əlebecho ca yežlyon' gan' chla'ac por yag yešə' na' no yičə' cuan de'e cui chac gaocho. Yežlyon' de'en nac ca' bito bi bi zaquə'ən par xan yežlyon', nach chbejyichje'en na' chžin ža catə' chzeye' de'e ca' chla'ac laogüennə'.

Zotezə zocho chonlilažə'əcho Diozən' čhedə' nezecho žjəyecho len le'

⁹ Na' ca naquə le'e, la'aŋə'əczə babi'a dižə'ən ca', chacda' čhele, na' zoa' segor bito gonle can' bagwnia' chso'on beŋə' ca'. Nežda' gonšgacze can' cheyalə' goncho laogüe de'en babebej Diozən' chio'o xni'a de'e malən'.

¹⁰ Diozən' naque' beŋə' güen. Na' bito ganlaže'e can' babenle xšine'enə', na' can' ne'e chonczen na'a chaclenle yeziquə'əchlə beŋə' bagwleje' par

zjənaque' lažə' ne'enə', chonlen laogüe de'en chaquele che'enə'.

¹¹ Nezele žjəyezole len Cristən'. Na' de'e na'anə' yedote žlac cuiṇə' yide' de'e yoblə cheyaḷə' cue' yichjle de'en žjəyezole len le', can' bachi' yichjle ṇa'a par chaclen ljuežjle.

¹² Bito gacle beṇə' godenag len xtižə' Diozən'. Legonlilažə' Diozən' can' bagwso'on beṇə' ca' bagwnitə', beṇə' ca' gosə'əzi' de'en ben Diozən' lyebe əgwnežjue' lega'aque'. La'aṇə'əczə' cui gosə'əzi'en cate, con gwso'onlilažə'əteze'ene'.

¹³ Diozən' bene' lyebe de que xi'in dia che de'e Abraannə' əsa'aque' beṇə' zan. Na' de'en naque' Dioz na' notoch no no ṇla' beṇə' yoblə beṇə' napəch yelə' gwnabia' cle ca le', de'e na'anə' bzo cuine' testigw gwne': "Guaquəczə' can' nia'anə' chedə' zoa' naca' Dioz."

¹⁴ Gwne': "De'e li goncza' par nič gaquə güen čio'. Na' de'e li goncza' par nič xi'in dia čio'onə' əsa'aque' beṇə' zan."

¹⁵ Na' sša gwzo de'e Abraannə' benlilažə'əteze' Diozən' xte que bžin ža goc can' ben Diozən' lyebe len le'.

¹⁶ Beṇəchən' chəsə'əzoe' jorament chəsə'əne' de que be'enə' chnabia'ach ca lega'aque' gwnežjue' castigw čega'aque' šə cui so'one' complir can' choso'ozoe' jorament. Chso'one' ca' par nič beṇə' ca' chsa'acyožə' lega'aque' se'ejle'e čega'aque' na' yesyə'əyacxenlaže'e.

¹⁷ Beṇə' ca' chon Diozən' cuent zjənaque' xi'in dia che de'e Abraannə' laogüe de'en chso'onlilaže'e Diozən', Diozən' bene' par nič nitə'əchgüe' segor de que guaquəczə' can' bene' lyebe, na' bito chše'e

can' bansi'e xneze gone'. De'e na'anə' bzo cuine' testigw gwne': "Guaquæczən çhedə' zoa' naca' Dioz."

¹⁸ Ca naquə Diozən' bene' lyebe na' leczə bzo cuine' testigw gwne': "Guaquæczə can' nia'anə' çhedə' zoa' naca' Dioz", bene' ca' par niçh nezecho de que caguə de'e te can' gwne'enə'. Na' bito chac güe'e dižə' güenlažə'. Diozən' bene' lyebe na' bzo cuine' testigw par niçh bito žebcho sino yebeicho de'en nezecho žjəyezochó len le', chio'o bagwñabechone' bezi'ixene' xtolə'əchon'.

¹⁹ Na' de'en nezecho žjəyezochó len Diozən' bito chac çhop lažə'əcho sino zotezə zochó chonlilažə'əchone' çhedə' la' nezecho de que Jeso'osən' chne' fabor chio'o lao Diozən' ca bχoz əblao checho.

²⁰ Jeso'osən' bazjəyezoe' gan' zo Diozən' na' chone' par niçh leczə chio'o žjəyezochó len le'. Na' Jeso'osən' naque' bχoz əblao checho, ben' gwx-aquə'əlebe ca bχoz Melquisedequən'.

7

Jeso'osən' naque' ca bχoz Melquisedequən'

¹ Na' Melquisedequən' goque' rei gan' nzi' Salem na' Diozən' ben' naquə le'ezelaogüe beñə' blao gwleje' le' par goque' bχoz. Na' catə' beza' de'e Abraannə' beyož bene' gan' lao rei ca' beñə' ca' gosə'ədiləlen beñə' Sodoma ca', bχoz Melquisedequən' jəšague' le' na' len yelə' guac che Diozən' bene' par niçh goc de'e šao' de'e güen che de'e Abraannə'.

² Na' de'e Abraannə' botobe' de'e ca' gosə'əban rei ca' che beñə' Sodoma ca' na'

bnite'en ši cuen de'e naquə lebe nach gwleje' tcuenən par bnežjue'en bχoz Melquisedequən'. Melquisedequən' zeje dižə' "rei beṇə' chnabia' güen". Na' gwnabi'e gan' nzi' Salem, na' Salemən' zeje dižə' "gwnitə' beṇə' binlo".

³ Bito nyojən šə no goquə de'e xaxna' Melquisedequən' na' nique nyojən šə no goquə de'e xaxta'ogüe'e, na' nic nyojən batə'əquə' golje' na' batə'əquə' gote'. De'e na'anə' nezecho cuiṇə' te yelə' naquə bχoz che'enə' na' leczə de'e na'anə' gwxaquə'əlebene' ca Xi'in Diozən'.

⁴ Le'e gon xbab de que bχoz Melquisedequən' goque' beṇə' blao. De'e na'anə' de'e xaxta'ocho Abraannə' lao ši cuen güejə de'e ca' gwleje', bnežjue' tcuenən bχoz Melquisedequən'.

⁵ Na' beṇə' ca' gwsa'aljə lao dia che de'e Lebin', beṇə' ca' besyə'əyalə' par gwsa'aque' bχoz, nyojən le'e lei de'en bzoj de'e Moisezən' de que yesə'əzi'e tcuen lao ši cuen yoguə' cuantzə de'e gotə' che beṇə' Izrael ca' yelə' la'anə'əczə yoguə'əlolga'aque' zjənaque' xi'in dia che de'e Abraannə'.

⁶ Melquisedequən' bito əṇacho golje' lao dia che de'e Lebin', pero gwxi'e tcuen lao ši cuen de'en botobə de'e Abraannə' na' len yelə' guac che Diozən' bene' par niçh goc güen che de'e Abraannə' ben' ben Diozən' lyebe əsa'ac xi'in dia che'enə' beṇə' zan.

⁷ Na' nacia' de que Melquisedequən' zaquə'əche' cle ca de'e Abraannə' chedə' Melquisedec na'anə' gwdape' yelə' guac che Diozən' na' bene' par niçh goc de'e güen che de'e Abraannə'.

⁸ Na' beṇə' ca' gwsa'ac bχoz segon can' na lei

de'en bzoj de'e Moizezən' gosə'əzi'e tcuen lao ši cuen cuantzə bi de'en gotə' che beṇə' Izrael ca' yelā'. Bxoz ca' gwsa'aque' beṇaḥ na' gwsa'ate'. Pero Melquisedequən' ben' gwxi' tcuen lao ši cuen de'en botobə de'e Abraannə', cho'en dižə' che' ca beṇə' ne'e zoczə.

⁹⁻¹⁰ Na' ca naquə de'e Abraannə' bnežjue' Melquisedequən' tcuen lao ši cuen de'e ca' botobe' de'en gosə'əban rei ca', de'en na'anə' guaquə əṇaḥo de que de'e Lebin' lecə bnežjue' Melquisedequən' tcuen güejə lao ši cuen de'e ca' botobə de'e Abraannə'. Guac əṇaḥo ca' chedə de'e Lebin' golje' lao dia che de'e Abraannə' la'anə'əczə bitonə' galje' catə'an Melquisedequən' jəšague' de'e Abraannə'. De'e Lebin' goque' xa beṇə' nech ca' əgwsa'ac bxoz che beṇə' Izrael gwlaž checho ca' cana', na' lei de'en bzoj de'e Moizezən' nan de que yesə'əzi'e tcuen lao ši cuen cuantzə bi de'en de che beṇə' Izrael ca' yelā'.

¹¹ Žalə' bxoz ca' beṇə' ca' gwsa'aljə lao dia che de'e Lebin' goc so'one' par niḥ yichjla'aždao' beṇə' gwlaž checho ca' əsa'aquən can' chene'e Diozən', bito byažjecho yeto bxoz žalə' ca'. Pero de'en cui goquə so'one' par niḥ əsa'ac yichjla'aždao' beṇə' can' chene'e Diozən', de'e na'anə' bidə Jeso'osən' par naque' bxoz chechon' na' gwxaquə'əlebene' ca Melquisedequən'.

¹² Jeso'osən' naquəcze' bxoz chechon' la'anə'əczə cui naque' dia che de'e Lebin'. De'e na'anə' nezecho banža' lei de'en choe' dižə' che bxoz che nasyon Izrael chechon'.

¹³ Bxoz checho ben' cho'echo dižə' chei, golje' lao dia che de'e Jodan', na' bitoch bchoj no gaque bxoz

entr beṇə' ca' əgwsa'aljəch lao dia che de'e Jodan'.

14 Nezczecho de que Xanchon' golje' lao dia che de'e Jodan', pero de'en bzoj de'e Moizezən' le'e lein' nan de que beṇə' ca' gwsa'aljə lao dia che de'e Lebin' əsa'aque' bḫoz.

15-16 Bḫoz checho Jeso'osən' naque' ca bḫoz Melquisedequən'. Bito golje' lao dia che de'e Lebin' na' bito naque' bḫoz can' na lei de'en bzoj de'e Moizezən'. Naque' bḫoz chedə' bito gwzoi yelə' gotən' le', na' zocze' zejlicane.

17 Na' de'e nga nyojən can' gož Diozən' Jeso'osən' nan:

Naco' bḫoz beṇə' zo zejlicane

na' naco' ca bḫoz Melquisedequən'.

18 Ca naquə bḫoz ca' beṇə' ca' ben Diozən' mendad gwnitə' cana', bitoch none' mendad nite'e na'a chedə' de'en gwso'one'enə' bito zaquə'an par əsa'ac yichjla'aždao' benachən' can' chene'e Diozən', na' bito nsa'an yelə' guac che Diozən'.

19 Leina' bito zaquə'an gonən par niçh yichjla'aždao' beṇə' əsa'acquən can' chene'e Diozən'. Pero na'a bazo Jeso'osən' chone' par niçh chac yichjla'ažda'ochon' can' chene'e Diozən'. Na' nezecho chaquəch güen checho cle ca che beṇə' ca' zjənombia' lein'. Jeso'osən' chone' par niçh zocho binlo len Diozən'.

20 Na' par niçh nezecho de que Jeso'osən' naque' bḫoz chechon', Diozən' bzo cuine' testigw gwne': Naquəcze' bḫozən' chedə' zoa' naca' Dioz.

21 Beṇə' ca' gwsa'aque' bḫoz segon can' bzoj de'e Moizezən', Diozən' bito gože' lega'aque' can' gože' Jeso'osən'. Nyojən' can' gože'ene', nan:

Diozən' bzo cuine' testigw gwne':

“Naquæczo' b̄xozən' çhedə' zoa' naca' Dioz.

Na' bito gwša'a can' ni'anə'.

Le' naco' b̄xoz ben' zo zejlicane.

Naco' ca Melquisedequən'.”

²² Nezecho de que Jeso'osən' bedəlo'ine' chio'o de que Diozən' choncze' con can' none' lyebe par gaquəlene' chio'o. Na' de'en none' lyebe gone' n̄a'a naquəchən güen cle ca de'en bene' lyebe gone' antslə.

²³ Beṇə' ca' gwsa'aque' b̄xoz segon can' na lei de'en bzoj de'e Moisezən', gwsa'aque' beṇəch na' gwsa'ate', pero benitə'ateczə lguə'aga'aque'. De'e na'anə' gwsa'aque' beṇə' zan.

²⁴ Pero Jeso'osən' zoe' zejlicane na' de'e na'anə' zejlicane naquæcze' b̄xoz chechon'.

²⁵ Na' notə'atezə beṇə' chše'ene'ene' n̄ite'e binlo len Diozən', Jeso'osən' nape' yelə' guac par chocobe' yichjla'ažda'oga'aque'en con šə chso'onlilažə'ene'. Nape' yelə' guac par gone' ca' çhedə' zocze' zejlicane chṇabe' goclen lao Diozən' par yoguə' chio'o chonlilažə'əchone'.

²⁶ Na' Jeso'os nan' naque' b̄xoz əblao chechon' na' zaque'e par gaquəlene' chio'o çhedə' chone' cayaṇə'ən chazlažə' Diozən'. Bito bi dolə' nape', na' bito bi de'e mal chone', na' nic chone' xbab mal. Zoe' gan' zo Diozən', chṇabi'e txen len le'.

²⁷ Bito bi xtole'e de na' de'e na'anə' bito cheyalə' gote' bia yixə' par yezi'ixen Diozən' xtole'enə' can' gwso'on beṇə' ca' gwsa'ac b̄xoz segon can' na lei de'en bzoj de'e Moisezən'. Yoguə' ža zgua'atec gwso'ote' bia yixə' par niçh gosə'əṇabe' bezi'ixen Diozən' xtolə'əga'aque'enə' na' techlə lecə gwso'ote' bia yixə' par gosə'əṇabe' bezi'ixen

Diozən' xtolə' beṇə' Izrael ca' yelā'. Šlinzə bnežjw cuin Jeso'osən' por ni checho catə'an gwso'ot beṇə' le' le'e yag corozən' na' bitoch gate' yeto.

²⁸ Beṇə' ca' gwsa'ac bḫoz əblao segon can' na lei de'en bzoj de'e Moisezən' gwsa'aque' beṇə' güen de'e mal can' zjənaquə yeziquə'əchlə beṇə'. Zan iz bagoc bzoj de'e Moisezən' lei che Diozən' cata' Diozən' bzo cuine' testigw de que sele'e Xi'ine'enə' par gaque' bḫoz əblao chechon' na' gwne': "Gaquəcze' bḫoz əblaon' chedə' zoa' naca' Dioz." Na' Xi'ine' na'anə' zocze' zejlicane, na' naquə yichjla'aždaogüe'enə' cayanə'an chene'e Diozən'.

8

Cristən' chone' par niçh chac de'e cobə de'en non Diozən' lyebe gone' par gaquəlene' chio'o

¹ Na'a ža zo bḫoz əblao chechon', na' chi'e yoban' chnabi'e txen len Diozən' ben' naquə le'ezelaogüe beṇə' blao. Lennə' naquən de'e žialaoch lao yoguə' de'en babe'echo dižə' chei.

²⁻³ Bḫoz əblao ca' beṇə' ca' gwso'ot bia yixə' lo'o yo'odao' de'en gwso'on de'e xaxta'o chio'o beṇə' Izrael jso'e xchenga'aquəbən' gan' nzi' "Latjə gan' zo Diozən'" par niçh Diozən' bezi'ixene' xtolə'əga'aque'enə' len che beṇə' ca' yelā'. Na' de'en gwso'one'enə' naquən ca de'en chac yoban' gan' zo Diozən'. De'e na'anə' benən byen bnežjw cuin Jeso'osən' gwso'ot beṇə' le' par niçh naque' bḫoz əblao chechon' gan' zo Diozən', na' chone' par niçh Diozən' chezi'ixene' xtolə' chio'o chonlilažə'əchone'.

4 Na' bito naque' b \underline{x} oz žalə' ne'e zoe' lao yežlyon', chedə' banitə' b \underline{x} oz ca' beṇə' ca' chjsoa' bi de'en chjsoa' lao Diozən' segon can' na lein'.

5 Na' yoguə'əloł de'en chso'on b \underline{x} oz ca' beṇə' ca' chso'on can' na lein', naquən latə' laszə ca naquə de'en chac yoban'. Diozən' bene' mendad len de'e Moisezən' antslə ze'e so'on de'e xaxta'o chio'o beṇə' Izrael yo'o de'e lachə'ənə' gan' gwso'o b \underline{x} oz ca' par gwso'elaogüe'e Diozən', gože'ene': "Yoguə' de'en bagwnia' gonle, legonən cayanə'ən blo'ida' le' catə'ən gwzochəo lao ya'anə'."

6 Pero na' de'en chon Cristən' zaquə'əchən cle ca de'en gwso'on b \underline{x} oz ca' beṇə' ca' gwso'on can' na lein'. Na' lecəzə de'e cobə de'en chon Diozən' len chio'o naquəchən güen cle ca de'en bene' antslə, chedə' de'e xench de'en non Diozən' lyebe gone' par gaquəlene' chio'o ṇa'a.

7 Žalə' de'en ben Diozən' par goclene' beṇə' Izrael gwlaž checho ca' de'e nech benən par ničh gwsa'ac yičhja'ažda'oga'aque'enə' can' chene'ene', bito bsele'e Cristən' žalə' ca'.

8 Pero nacbia' Diozən' bito bebeine' lega'aque', nachən' gwne':

Chona' lyebe gona' to de'e cobə par gaquəlena' le'e beṇə' Izrael catə' əžin ža,
nada' Xanle Dioz ənia' ca'.

9 Nža'an beṇa' len de'e xaxta'ole ca' ca tyemp catə'ən goquəlenga'aca'ane' par ničh besyə'əchoje' Egipton'.

Lega'aque' bito gwso'one' can' gwso'one' lyebe len nada'.

De'e na'anə' nada' Xanle Dioz bitoch bengə'aca'ane' cas.

- 10 Quinga gona' par gaquələna' le'e beṇə' Izrael
 catə'an əžin žan':
 Nada' Dioz gona' par niḥ šo'o yichjle de'e ca' nona'
 mendad gonle,
 na' gona' par niḥ yebeilen lo'o la'ažda'olen'.
 Na' toza' nada' güe'ela'ole na' le'e gacle xi'ina'.
 11 Na' ni tole cui chyažjən əgwšed əgwlo'i ljuežjle
 par niḥ gombi'ale nada'
 čhedə' cana' yoguə'əle gombi'ale nada',
 le'e cuitec bi zaquə'əle na' len le'e nacle beṇə' blaο.
 12 Cana'ach bitoch gona' xbab che de'e mal ca'
 de'en babenlenə'
 čhedə' ca orən' babezi'ixena' xtolə'alenə'.
 13 Na' ca naquən' be' Diozən' dižə' che de'e cobən'
 de'en gwne' gone' par gaquələne' nasyon chechon',
 nezecho chde che de'en bene' mendad so'one'
 antslə čhedə' banaquən de'e golə na' bitoch
 cheyalə' gonchon.

9

Yo'odao' de lachə' de'en gwso'on beṇə' Izrael ca gwxaquə'əleben ca gan' zo Diozən'

¹ Cana'ate ben Diozən' mendad naclə so'on beṇə'
 Izrael gwlaž checho ca' par so'ela'ogüe'ene'. Na'
 lecəə bene' mendad so'one' to yo'odao' par le'.

² Yo'oda'onə' goquən de lachə'. Na' lo'o cuart
 nechən' bosozoe' to candeler na' to mes gan'
 bosozoe' yetxtil de'en naquə par Diozən'. Na'
 cuart nechən' nzi'in "Latjə che Dioz".

³ Na' cuart əgwchopen' nzi'in "Latjə gan' zocəə
 Diozən'". Na' entr cuart ca' chopə gwze to lachə'.

⁴ Na' lo'o cuart əgwchopen' bosozoe' yeto mes
 de or gan' bosozeye' yal. Na' gosə'ayixjue' to

caj na' boso'oguzje' doxenən or. Na' lo'o caj na' boso'ozoe' to yesə' de or gan' boso'ože'e yelə' guao de'en gwza' yoba de'en nzi' mana, na' leczə lo'o caj na' gosə'əgü'e'e garrot che de'e Ronnə' de'en bexejə. Na' leczə na' boso'ože'e yej ta'a ca' gan' byoj de'en ben Diozən' mendad so'one' par niçh gaquəlene' lega'aque'.

⁵ Na' lao tap che cajən' boso'onite'e chopə lgua'a lsaquə' angl beñə' gosə'əzi' querobines. Na' gan' zjəzecha querobines ca' chey che'eni'in, par niçh nachia' de que Diozən' zoe' na'. Toe' gwzecha šyichjən na' yetoe' yešyichjən. Na' lao tap che cajən' entr lega'aque' nzi'in "Latjə che yelə' cheyašə' cheži'ilažə' che Diozən'". Pero bitoch che'enda' güe'echa' dižə' che to to de'e ca'.

⁶ Na' beyož banitə' cuart ca' na' beyož boso'onite'e yoguə' de'e ca' lo'inə', yoguə' ža ja'ac bχoz ca' lo'o cuart nechən' gan' gwso'one' can' ben Diozən' mendad so'one' par əso'ela'ogüe'ene'.

⁷ Na' cuart əgwchopen' tozə bχoz əblaon' goc gwyo'e ze tgüiz güejə. Na' catə'ən gwyo'enə' benən byen bexe'e chen che bia yixə' bže'en lao cajən par niçh Diozən' bezi'ixene' xtolə'enə' na' bezi'ixente' xtolə' beñə' ca' yelə'.

⁸ Na' de'en cui gotə' lsens šo'o nochlə beñə' lo'o cuartən', Spirit che Diozən' chzejni'in chio'o de que bito gaquə šo'ocho gan' zo Diozən' žalə' ne'e chone' mendad gaquə yoguə'əloł de'en gwso'one' lo'o yo'odao' de'en nsa' chopə cuart.

⁹ Na' yo'oda'onə' len yoguə' de'e ca' gwso'on bχoz ca' lo'inə' chlo'in chio'o zocho na'a can' naquə yoban' gan' zo Diozən'. De'e zan de'en gwso'on de'e χaxta'ocho ca' gwso'ela'ogüe'e Diozən' lo'o

yo'oda'onə' pero bito beyac yichjla'ažda'oga'aque'en can' chene'e Diozən' la'anə'əczə boso'onežjue' Diozən' bi de'en boso'onežjue'ene' na' la'anə'əczə gws'o'ote' bia yixə' par gws'o'elaogü'ene'.

¹⁰ De'e ca' boso'onežjue' Diozən' gwsa'aquən no nis yelə' guao na' no bia yixə'. Na' de'e zan costombr čhega'aque' gotə' par gwsa'a gosə'əyib cuinga'aque'. Na' yoguə' de'e ca' gws'o'one' nič cuerp čhega'aque'enə' goquən xi'ilažə' can' na lein'. Yoguə' de'e ca' gws'o'one'enə' gws'o'onən žin xte catə'an bselə' Diozən' Cristən' par bene' de'e zaquə'əche.

¹¹⁻¹² Pero bazo Cristən' na'a naque' bχoz əblao čechon' na' chone' par nič chac güen can' gwnitə' de'e xaxta'ocho ca' lez gaquə. Babeyepə' yoban' na' zoe' gan' zo Diozən'. Na' gan' zoe'enə' gwxaquə'əleben ca quart əgwchope čhe yo'odao' čhe beṇə' Izrael ca', pero naquəchən de'e zaquə'əche na' de'e güenč clezə ca de'en gwzo čhe bχoz ca' cana', la' bito naquən de'e ben beṇəch. Na' Cristən' zaque'e par gwyo'e gan' zo Diozən' čhedə' bnežjw cuine' gws'o'ot beṇə' le' na' blalj xčhene'enə' le'e yag corozən'. Bito nacho bete' no šib o no go'oṇ dao' na' blalje' xčhembən' par nič be'en Diozən'. Šlinzən' gwdixjue' xtolə'əchon' len xčhene'enə' par zejlicane.

¹³ Ca naquə de'e xaxta'ocho ca' bito gwsa'aque' xi'ilažə' can' na lein' šə bagosə'əgane' no beṇə' guat. Na' par nič besyə'əyac cuerp čhega'aque'enə' xi'ilažə' de'e yoblə can' na lein', bχoz ca' boso'ože'e lega'aque' no xčhen šib o no xčhen go'oṇ na' len de de'en gwche' catə'an cheyož choso'ozeye' baquə'

dao'.

¹⁴ Pero xchen Jesocristən' de'en bedəlalje' par beque'e xtolə'əchon' zaquə'əchən ca xchen bia yixə' ca'. Xtolə'əcho na'anə' benən par nič goccho ca beṇə' guat len yichjla'ažda'ochon', pero na'a baben Jesocristən' par nič naquə yichjla'ažda'ochon' xi'ilažə' nič cho'ela'ocho Diozən' ben' zo zejlicane. Spirit che Dioz nan' goclenən Jeso'osən' par ben cuine' lažə' na' Diozən' par gwdixjue' xtolə'əchon'. Na' ca naquə Jeso'osən' bitoczə bi bi xtole'enə' gotə'.

¹⁵ Na' de'en bedəlalj xchen Cristən' gwzolaο chac de'e cobən' de'en chon Diozən' lyebe gone' par chaclene' chio'o. Na' bachac de'e cobən' par nič ca' baltezə beṇə' bagwlej Diozən' žjəsyə'ənite'e len le' zejlicane. De'en bedəlalj xchen Cristən' gwdixjue' lente de'e mal ca' bencho žlac ne'e chac de'e neche de'en ben Diozən' lyebe gone' par goclene' de'e xaxtao' chio'o beṇə' Izrael.

¹⁶ Catə' to beṇə' babene' testament, bito gaquə can' na testamentən' xte catə'əch nezecho de que bagote'.

¹⁷ Na' ca naquə testamentən' bito gaquə can' nanṇə' žlac ne'e mban be'enə' ben len. Catə' bagote' cana'anə' gaquə can' nanṇə'.

¹⁸ Na' par nič gwzolaο goc de'e neche de'en ben Diozən' lyebe gone' par goclene' de'e xaxta'ocho ca', bene' mendad boso'olalje' xchen bia yixə'.

¹⁹ De'e na'anə' catə' de'e Moizezən' beyož be'elene' beṇə' ca' dižə' che yoguə'əloj de'en ben Diozən' mendad so'one' can' na lei che'enə', nach de'e Moizezən' bže'e lega'aque' xchen go'on dao' na' xchen šib nach nis. Bže'e lega'aque' de'e ca' len lata'

yišə' xa xilə' de'en mben color əxna na' len to xis yixə' dao' de'en naquə ca gwreg. Na' lecə bže'en librən' gan' nyoj leinə'.

²⁰ Na' de'e Moizezən' gože' lega'aque': "Chen ni ben Diozən' mendad əgwža'a le'e par nič gone' can' none' lyebe gone' par gaquəlene' chio'o."

²¹ Nach bža'ate'en yo'odao' de lachə'ən na' len yesə' ca' na' ša' ca' de'en boso'očhine' gan' gwsə'ela'ogü'e Diozən'.

²² Lei de'en bzoj de'e Moizezən' benən mendad boso'ože'e chennə' par nič zan de'en boso'očhine' gwsə'aquən xi'ilažə' can' na lein'. Diozən' bito bezi'ixene' xtolə' beṇə' žalə' cui boso'olalje' chen che bia yixə'.

De'en bnežjw cuin Cristən' gwsə'ote'ene' chac cheque'e xtolə' chio'o chonlilažə'əchone'

²³ De'e na'anə' benən byen boso'ože'e xchen bia yixə'ən de'e ca' besə'əčhine' lo'o yo'oda'onə' par nič gwsə'aquən xi'ilažə' can' na lein'. Pero xchen bia yixə' ca' bito gaquə gonən ca gaquə yičjla'ažda'ochon' can' chene'e Diozən' par nič šo'ocho gan' zoe'enə'. Tozə xchen Jesocrist nan' zaquə'ən par chonən ca chac yičjla'ažda'ochon' can' chene'e Diozən'.

²⁴ Catə' Cristən' gwdixjue' xtolə'əchon' bito gwyo'e lo'o quart əgwchope che yo'oda'onə' can' gwsə'on bəoz ca' cana' sino beyepe' yoban' gan' zo Diozən', na' na' zocze' na'a chne' fabor chio'o lao Diozən'. Na' quart əgwchope che yo'odao' che beṇə' Izrael na'anə' gwzon par bzejni'in chio'o can' naquə gan' zo Diozən'.

25 Bxoz əblao ca' ze tgüiz güejə gwso'e lo'o yo'oda'onə' gan' nzi' latjə gan' zoczə Diozən' bos'o'že'e chen che bia yixə'. Pero Cristən' bito byažjən əgwnežjo cuine' so'ote'ene' zan las. Šlinzən' blalj xchene'enə' par gwdixjue' xtolə'əchon'.

26 Žalə' byažjən laljə xchene'en zan las, babnežjw cuine' zan las dezd catə'an gwxe yežlyon' žalə' ca'. Pero caguə ca'anə'. Bnežjw cuine' šlinzə catə'an bžin or che'enə', na' de'en gwso'ote'ene' šlinzə cana', gwdixjue' xtolə'əchon' zejlicane.

27 Na' Diozən' bansi'e xneze de que əžin ža sa'at to to beṇačən' na' šlinzən' sa'ate'. Na' techlə əṇa Diozən' che to toga'aque' šə yesə'əzi'e castigw o šə nite'e mbalaz len le'.

28 Na' ca de'en sa'at beṇačən' šlinzə lecə šlinzən' bnežjw cuin Cristən' gwso'ote'ene' gwdixjue' xtolə' beṇačən'. Nach əžin ža yide' de'e yoblə, caguə par chixjəche' xtolə'əchon' sino par nič deyexi'e beṇə' ca' chəsə'əbezə batə'əquən' yide'enə'.

10

1 Lei de'en bzoj de'e Moisezən' chzejni'in chio'o latə'əlaszə che de'e güen de'en gaquə checho catə' yežincho yoban' gan' zo Diozən'. Pero leinə' bito goquə gonən par nič yichjla'aždao' beṇə' ca' gwso'on can' nanṇə' əsa'əquən can' chene'e Diozən', la'ənə'əczə gwso'ote' bia yixə' yoguə' iz par bezi'ixen Diozən' xtolə'əga'aque'enə'.

2 Žalə' de'en gwso'ote' bia ca' benən par nič cuich so'one' de'e malən' bitoch besə'əyazjene' so'otəche'eb žalə' ca'. Pero de'en gwsa'acbe'ine'

ne'e chso'one' de'e malən' nachən' yoguə' iz gwso'ote'eb.

³ Na' de'en gwso'one' ca' bito gwsa'anlaže'e de que zjanape' dolə'.

⁴ Na' gwso'one' ca' yoguə' iz chedə' chen che no go'on dao' o no šib bito zaquə'an par yeca'an xtolə' benə'.

⁵ De'e na'anə' catə' Cristən' bide' yežlyo nga gože' Xe' Diozən':

Nezda' to de'en chazlažə'əcho' mazəchlə ca bia yixə' bian' chso'ot benə' par chso'ela'ogüe'e le', na' mazəchlə ca bichlə de'en chso'one' le'. De'en chazlažo'onə' əgwnežjo cuina' par chixjua' xtolə' benachən'.

⁶ Lennə' de'en chebeido' mazəchlə ca bian' chso'ote' par choso'ozeye',

na' mazəchlə ca xchen bia yixə' de'en chəsə'alalje' catə' chəsə'əṇabe' yezi'ixeno' xtolə'əga'aque'enə'.

⁷ De'e na'anə' goža' le' can' nyojən le'e librən' gan' nan:

“Dioz chia', za'a nga zedəyena' con can' chazlažo'onə'.”

⁸ Zgua'atec Cristən' gože' Xe' Diozən': “Nezda' de'en chazlažə'əcho' na' de'en chebeichdo' ca de'en chso'ote' bia yixə' na' ca bichlə de'en chso'one' le', na' ca de'en choso'ozeye' bia ca' chso'ote' na' lecə ca de'en chəsə'alalje' xchenga'acobən' par chəsə'əṇabe' chezi'ixeno' xtolə'əga'aque'enə'.” Gwne' ca' la'aṇə'əczə lei de'en bzoj de'e Moisezən' benən mendad gwso'ote' bia yixə' na' gwso'one' bichlə de'e ca' gwso'one'enə'.

⁹ Nach Cristən' gože' Diozən': “Nada' za'a zedəyena' con can' chazlažo'onə'.” De'e na'anə' nezecho de que

Diozən' bitoch chene'ene' gotcho bia yixə' can' na
lein' chedə' Cristən' bagwdixjue' xtolə'əchon'.

10 Cristən' bene' con can' gwyazlažə' Diozən'.
Šlinzən' bnežjw cuine' gwso'ot beṇə' le' par bey-
one' yichjla'aždao' yoguə' chio'o chonlilažə'əchone'
xi'ilažə'.

11 Beṇə' ca' zjənaquə bχoz, yoguə' ža nitə'ətezə
nite'e chso'ote' bia yixə' par xtolə' beṇə' Izrael ca'
yela', len la' xchen bia yixə'ən bito gaquə yeca'an
xtolə' beṇə'.

12 Pero na' Cristən' bnežjw cuine' šlinzə par
gwdixjue' xtolə'əchon'. Na' beyožən' zjəyechi'e gan'
chnabi'e len Diozən'.

13 Na' zoe' na' chbeze' əžin ža nitə' yoguə' de'e ca'
chso'on contr le' na' beṇə' contr che' ca' xni'enə'.

14 Na' de'en gwdixjw Cristən' xtolə'əchon' šlinzə
cana', na' beyone' yichjla'aždao' yoguə' chio'o
chonlilažə'əchone' xi'ilažə', leczə babene' par
ničh chac yichjla'ažda'ochon' can' chene'e Diozən'
gaquən zejlicane.

15 Na' caguə nadə'əza' cho'a dižə' che de'e ca'.
Leczə Spirit che Diozən' benən ca' byojən ca' par
ničh nezecho naquən de'e li, nan:

16 Quinga nona' lyebe gona' len lega'aque' catə' əžin
žan':

Nada' Dioz gona' par ničh šo'o yichjga'aque' de'e ca'
nona' mendad so'one',

na' gona' par ničh yesyə'əbeine'en lo'o
la'ažda'oga'aque'enə'.

17 Nach nyoj yeto de'en nan:

Cuatəch žjsa'alažə'a che de'e mal ca' bagwso'one'
na' che xtolə'əga'aque'enə'.

18 Na' catə' babezi'ixen Diozən' xtolə'əchon', bitoch chyažjecho gotcho bia yixə' par əṇabcho yezi'ixene'en.

Cheyalə' socho güe'ela'ocho Diozən' na' goncho orasyon laogüe'enə'

19 Na'a ža benə' bišə', laogüe de'e blalj Jesocristən' xchene'enə' par gwduxjue' xtolə'əchon' gwaquəczə š'ocho gan' zo Diozən' sin cui žebcho.

20 De'en ben Jesocristən' par nič š'ocho gan' zo Diozən' naquən to de'e cobə la' antslə "Latjə gan' zo Diozən'" lo'o yo'oda'onə' bgašə'an len to lachə'. Pero na'a de'en bnežjw cuin Jesocristən' por ni chechon' bito bi de de'en chcuašə'an latjə gan' zo Diozən' yoban' len chio'o chonlilažə'əcho Jesocristən'.

21-22 Na' de'en naquə Jesocristən' bχoz əblao checho, na' de'en chaclene' chio'o naccho ca family che Diozən', de'e na'anə' cheyalə' socho güe'ela'ocho Diozən' na' goncho orasyon laogüe'enə' do yichj do lažə'əcho, gonlilažə'əchone' sin cui gaquəžejlažə'əcho. Goncho ca' laogüe de'en blalj xchen Jesocristən' par beque'e xtolə'əchon'. Na' leczə bagwchoacho nisən'.

23 Na' can' gwzolacho chonlilažə'əcho Jesocristən', ca'aczən' cheyalə' sotezə socho gonlilažə'əchone' na' yebeicho de'en žjəyecho len le', chedə' la' Diozən' ben' ben lyebe žjəyecho len le', chone' complir can' ne'enə'.

24 Na' leczə cheyalə' güe'e ljuežjcho balor par nič gaquəchecho che ljuežjcho na' gonchcho de'e güen to yetocho.

25 Na' bito cuejyichjcho de'en chdopcho txen par cho'ela'ocho Diozən', can' chso'on balə benə'

chəsə'əbejyichje'en. Cheyalə' gwtiplažə' ljuežjcho par nič sochcho chech gonlilažə'əcho Cristən'. Gonchcho ca' chedə' bazon baozə yidə Cristən' yeto.

26 Na' šə chio'o cuejyichjcho dižə' li che Diozən' de'en banombi'acho par gontezcho de'e malən', bitoch gaquəlenən chio'o de'en blalj xchen Je-socrisən' par beque'e xtolə'əchon'.

27 Na' šə goncho ca', cheyalə' žebcho castigw de'en gon Diozən' chio'o, chedə' notə'ətezcho choncho contr le' əsele'e chio'o lo'o yi' gan' cuiay'i'icho.

28 Ca naquə beŋə' ca' chsa'aque' bitobi zaquə' lei de'en bzoj de'e Moizezən' na' bito choso'ozenague' chei, beŋə' gwlaž checho ca' chso'ote' lega'aque' sin cui chesyə'əyaše'ene' lega'aque', con šə nitə' chopə o šonə testigw beŋə' chso'e dižə' de que de'e malən' bagwso'one'.

29 Pero chio'o ža šə gue'icho Xi'in Diozən' na' Spirit che'enə' de'en nži'ilažə' chio'o, zaquə'əczən par si'icho castigw gualəch, na' le'egatezə ca' šə gaquecho cui bi zaquə' xchene'enə'. Lennə' bedəlalje' par nič gwzolao chac de'e cobə de'en ben Diozən' lyebe gone' par chaclene' chio'o na' bedəlalje'en par nič yichjla'aždao' chio'o chonlilažə'əchone' beyaquən xi'ilažə'.

30 Nezecho de que Diozən' gwne': "Nadan' co'olažə'a beŋə' ca' chso'on contr nada' na' nadan' gonga'aca'ane' castigw." Na' leczə nyojən nan: "Diozən' gwnežjue' castigw che beŋə' ca' bagwcue'e ca' xi'ine' šə so'one' de'e malən'."

31 Na' šə cuejyichjcho Diozən' ben' zo zejlicane, lechgualə de'e žebcho ca naquə castigon' de'en gone' chio'o.

³² Le'e žjsa'alažə' can' bchejele la'anə'əczə de'e zan de'e gwdi' gwxaquə'əle ca tyempən' catə'an ze'e gwzolao gwyejñi'ile che Cristən'.

³³ Besyə'əbei beṇə' contr chele ca' boso'ogüie' can' bžaglaole catə'an boso'ožia boso'onite'e le'e na' catə'an gosə'aque'e de'en gotə' chelen'. Na' lecəə bchejele par beṇle txen len beṇə' ljuežjcho ca' catə'an goc chega'aque' ca'.

³⁴ Beyašə' beži'ilažə'əle ljuežjcho ca' beṇə' ca' gwsa'atə' ližya na' gwzole mbalaz la'anə'əczə gosə'əca' beṇə' de'en gotə' chele, chedə' la' gwṇezele de que laogüe de'en chonlilažə'əle Cristən' de de'e zaquə'əche chele yoban' de'e cui te chei.

³⁵ Na'a ža, bito cuejyichjle ca de'en chonlilažə'əlene', chedə' gwžin ža catə' sole mbalaz.

³⁶ Bito žjxaquə'əlažə'əle par yeyož gonle yoguə'əlol can' chene'e Diozən' la' šə gonle can' chene'ene'ənə' žjəyezole len le' zejlicane can' bene' lyebe.

³⁷ Nyojən can' gwna Diozən' nan:

Lechguale lgüegwzə əžin ža catə' yidə ben' əselə'a, na' bito šeichene'.

³⁸ Na' beṇə' ca' zjanaque' beṇə' güen laogua'anə' cheyalə' nite'e so'onlilaže'e nada'.

Na' beṇə' ca' chəsyə'əbižə' cuich chso'onlilaže'e nada', bitoczə yebeiga'acda'ane'.

³⁹ Pero na' chio'o ža, bito ṇacho naccho ca beṇə' ca' chesyə'əbižə' cuich chso'onlilaže'e Diozən', beṇə' ca' yesə'abiayi'. Chio'o zotezə zocho chonlilažə'əchone' na' de'e na'anə' ṇezecho žjəyezochə len le' zejlicane.

11

Diozən' chebeine' beṇə' laogüe de'en chso'onlilaže'ene'

¹ De'en chonlilažə'əcho Diozən' nezecho gwaquə de'en chbezcho gaquə, na' nezecho de'e liczə can' na Diozən' che de'e ca' cui chle'icho.

² Na' beṇə' ca' gwnitə' gwłalte, bebei Diozən' lega'aque' laogüe de'en gwso'onlilaže'ene'.

³ Na' de'en chonlilažə'əchone' chejni'icho de que con bene' mendad goc yoban' na' yežlyon'. Bito bi bchine' par bene'en.

⁴ Na' ca naquə de'e Abelən', de'en benlilaže'e Diozən', goque' beṇə' güen lao Diozən' na' bebei Diozən' de'en bnežjw de'e Abelən' le' cle ca de'en bnežjw de'e Cainnə'. Na' la'aṇə'əczə cuich zo de'e Abelən', de'en benlilaže'e Diozən' chzejni'in chio'o de que can' cheyałə' goncho.

⁵ Na' Enoquən' leczə benlilaže'e Diozən', na' de'e na'anə' Diozən' bezi' beque'ene' sin cui gote'. No-toch no ble'i le'. Na' nyojən che' de que chebei Diozən' le' antslə ze'e yezi' yeque'ene'.

⁶ Diozən' bito chebeine' notə'ətezə beṇə' cui chonlilažə' le'. Na' šə no güe'elao' le', cheyałə' šejle'e de que zoczə Diozən' na' de que gwzenagczə Diozən' che' šə bi de'en əṇabene' le' do yichj do laže'e.

⁷ Na' ca naquə de'e Noen' ža, leczə benlilaže'e Diozən'. Na' Diozən' bosnisene' le' can' ze'e gaquə na' de'e Noen' gwyejle'e che'. De'e na'anə' Noen' bene' to barcw gan' gwyo'e len family che' ca' par nič bito gwsa'ate' len nisən'. Na' yelə' chonlilažə' che'enə' len Diozən' blo'in beṇə' ca' yez-iquə'əchlə gwža' yežlyon' de que gwsa'ape' dolə'.

Na' lēczə de'en benlilaž'e Diozən', de'e na'anə' Diozən' gwne' che' de que naque' beṇə' güen laogüe'enə'.

⁸ Na' de'en benlilažə' de'e Abraannə' Diozən', bzenague' catə' Diozən' bene' mendad šeje' zitə'. Na' gan' gwyeye' Diozən' blo'ine' le' yežlyon' de'en gaquə che'. Na' gwyeye' la'aṇə'əczə bito nombi'e latjən' ca orən'.

⁹ Na' de'en benlilažə' de'e Abraannə' Diozən', gwzoe' laž beṇə' zitə' gan' ben Diozən' lyebe gwnežjue' xi'in dia che' ca'. Na' de'e Abraannə' gwzoe' lo'o yo'o de lachə'əzə, na' lēczə lo'o yo'o de lachə'əzə gosə'ənitə' de'e xi'ine' Isaaquən' na' de'e xi'in xeso'e Jacobən', beṇə' ca' lēczə gosə'əbeze' gwnežjo Diozən' xi'in dia chega'aque' ca' yežlyon'.

¹⁰ Bito bi goque de'e Abraannə' de'en gwnite'e lo'o yo'o de lachə'əzə, chedə' gwzoe' lez əžin ža soe' gan' zo Diozən', gan' naquə to syoda güen de'e cui te chei, syoda de'en ben Diozən'.

¹¹ Na' ca naquə de'e Sar no'ol che de'e Abraannə', benlilaž'e Diozən' na' de'e na'anə' Diozən' bene' par nič bi'e bdao' na' gwxane'əbo' la'aṇə'əczə cuich zoe' xlaogüe'e sane'. Diozən' bene' ca' len de'e Sarən' chedə' Sarən' gwyejle'e de que Diozən' gone' can' bene' lyebe.

¹² De'e na'anə' la'aṇə'əczə de'e Abraannə' naque' beṇə' golə par so xi'ine', xi'in dia che' ca' gwsa'aque' beṇə' zan can' zjənaquə beljw ca' de'en zjəžia le' yoban' na' can' naquə yox de'en chi' cho'a nisda'onə', notono no gaquə gwlabē' xi'in dia che'enə'.

¹³ De'e Abraannə', de'e Isaaquən' na' de'e Jacobən', na' nochlə beṇə' ca', ne'e chso'onlilažə'əcze'

Diozən' catə' bžin ža gwsa'ate' la'anə'acžə cuinə' gac can' ben Diozən' lyeben'. Bito gwsa'acžejlaže'e, sino que gwse'ejle'ecze' de que gwžin ža gone' can' gwne'enə'. Na' lega'aque' gwsa'acbe'ine' de que zjənaque' ca beṇə' zitə' len beṇə' ža' lao yežlyon' na' de que bito bi lažga'aque' de lao yežlyo nga.

¹⁴ Na' de'en gwsa'aquene' cui bi lažga'aque' de lao yežlyon', nachbia' de que gwse'enene' yesə'əžine' ga yoblə gan' gaquə lažga'aque'enə'.

¹⁵ Žalə' gwso'one' xbab che yežən' gan' gwsa'alje' de que naquən lažga'aque'enə', zjəsyə'ənitə'əlje' na' žalə' ca'.

¹⁶ Pero gwso'one' xbab de que yoban' naquən lažga'aque'enə' na' gwse'enchgüeine' yesyə'əžine' na', chedə' la' güench naquən cle ca yežlyon'. De'e na'anə' Diozən' bito cheto'ine' čhega'aque' par əne' de que naque' Dioz čhega'aque' ben' chso'elaogüe'e, na' le' babenšaogüe'e to syoda par lega'aque'.

¹⁷⁻¹⁸ Na' ca naquə de'e Abraannə' benlilaže'e Diozən', de'e na'anə' bzenague' catə' Diozən' benene' prueb gože'ene': "Bet xi'inə' Isaaquən' can' choto' bia yixə' ca' na' chlaljə' xčhenga'aquəbən' par cho'elaogo'o nada'." Na' gwņeze de'e Abraannə' de que Diozən' bene' lyebe len le' de'e zan de'e güen de'e gaquə por xi'in dia che'enə'. Na' che bi'i nan' gož Diozən' de'e Abraannə': "Xi'in dia che Isaac na'azə gona' cuent lao dia čchio'onə'." Pero bia'acžə bzenag de'e Abraannə' ca de'en gož Diozən' le' got xi'ine' tlišə'ənə'. Na' bžin orən', Diozən' bito be'e latjə gote'ebo'.

¹⁹ De'e Abraannə' bzenague' par gote'ebo' chedə' gwņezene' de que Diozən' chac yosbane' beṇə' guat

ca'. Na' ca naquə Diozən' bito be'e latjə gote' xi'ine'enə' guac ə̃nacho de que Diozən' bosbane'ebo' ladjo beṇə' guat ca'.

²⁰ Nach leczə de'e Isaaquən' benlilaže'e Diozən', na' de'e na'anə' gwṇabene' Diozən' gone' güen len xi'ine' ca' de'e Jacobən' na' de'e Esa'on'.

²¹ Leczə de'e Jacobən' benlilaže'e Diozən', na' de'e na'anə' catə' bazon gate' gwṇabene' Diozən' gone' güen len xi'in̄ xesoe' ca', xi'in̄ de'e Jwsen'. Na' b̄chequə' yichje'enə' be'ela'ogüe'e Diozən' žiaša'atezə garrot che'enə'.

²² Na' de'e Jwsen' leczə benlilaže'e Diozən' na' gwyejle'e de que ə̃žin ža yesyə'əchoj beṇə' Izrael ca' Egipton' can' ben Diozən' lyebe. De'e na'anə' catə' bazon gate' bene' mendad yesyə'əyo'e žit che cuerp che'enə' catə' žjəya'aque' Canaanṇə'.

²³ Na' catə' goljə de'e Moisezən', de'e tant gwso'onlilažə' de'e xaxne'e ca' Diozən', bito besə'əžebe' so'one' contr can' ben de'e rein' mendad so'one' ca de'en gože' beṇə' Izrael ca' so'ot bi'i čhega'aque' ca'. Šonə bio' bosocuaše'e de'e Moisezən' ližga'aque'enə', čhedə' gwsa'aquene' nacho' xochechgua. Na' catə' bitoch goquə yoso'ocuaše'e'ebo', xi'in̄ rein' beque'ebo' boscha'ogüe'ebo'.

²⁴ Na' catə' bagwcha'o de'e Moisezən', benlilaže'e Diozən' na' de'e na'anə' bito gone'ene' gaque' cuent ca bi'i che de'e xi'in̄ Rei Faraonṇə'.

²⁵ Gwyazlažə'əche' bžaglaogüe' txen len beṇə' Izrael ca' ca de'en gosə'əzaquə'əzi' gosə'əzaquə'əyaše'e, cle ca gone' bi de'en čəsyə'əbei beṇə' mal ca' chso'one', la' de'e te čhei de'e ca'.

26 De'en bžaglao de'e Moizezən' gwxaquə'əleben ca de'en gwxaquə'əzi' Cristən'. Na' gocbe'ine' de que de'e zaquə'əche əžaglaogüe' yoguə' de'e ca' cle ca si'e doxen yelə' gwni'a che Egipton'. Gwņezene' gwžin ža catə' gon Diozən' par nič soe' mbalaz.

27 Na' de'en benlilaže'e Diozən' bito bžebe' rein' catə' bžin ža besyə'əchoje' Egipton' la'anə'əczə rein' bž'a'achgüe' lega'aque'. Na' de'e Moizezən' gwlo'o gwčhejlaže'e len de'e ca' bžaglaogüe' lao bene' par besyə'əchoje' Egipton' čhedə' gwņezene' zoczə Diozən' len le' ca ņacho chle'iczene' le'. La'anə'əczə Diozən' cui no čac le'i le'.

28 Na' de'e Moizezən' de'en benlilaže'e Diozən' bene' mendad len to to family beŋə' Izrael ca' gwso'ote' xilə' dao' ca' can' gož Diozən' le' na' bosə'ože'e xčhenga'aquəbən' ližga'aque'enə' par nič anglən' ben' bselə' Diozən' bito bete' bi'i nech ca' lao yoguə' family čhega'aque'enə'.

29 Na' beŋə' Izrael ca' de'en gwso'onlilaže'e Diozən', Diozən' bene' par nič Nisdao' Exŋan' goquən čhoplə xte bla' yo biž par nič goc gosə'ədie' yešla'alə. Pero na' beŋə' Egipto ca' catə' gwsa'aclačže'e yesə'ədie', beyeyjw nisən' gan' čəsə'ədi'enə' na' gwsa'ate' gwse'eje' nisən'.

30 Na' leczə de'en gwso'onlilažə' beŋə' Izrael ca' Diozən', de'e na'anə' Diozən' bene' par nič bebixə ze'e de'en gwyečhj doxen syoda Jericon' catə' beŋə' Izrael ca' jəsə'əžechje'en yoguə' ža lao gažə ža.

31 Na' de'e Raabən' no'olən' goquə sargat antslə, leczə benlilaže'e Diozən'. Na' de'en benlilaže'ene' bito gwžiyaye'e len beŋə' Jerico ca' beŋə' ca' cui bosə'ozenag che Diozən', čhedə' le' ža bgüialaogüe' beŋə' Izrael ca' liže'enə' beŋə' ca' jəsə'əgüia jəsə'əye'

laže'enə'.

³² ¿Bichxan' ən̄ia' ža? Bito nlatja' par gua'a dižə' che de'e Gedeon̄ə', che de'e Baraquən', che de'e Sanson̄ə', che de'e Jeften', che de'e Dabin', che de'e Samuelən' na' che yeziquə'əchlə beṇə' ca' gwsoe' xtižə' Diozən' cana'.

³³ Na' laogüe de'en gwso'onlilaže'e Diozən' bale' besə'əchoje' gwso'one' gan catə' gosə'ədiləlene' no rei, na' yebale' gwso'one' byen par niç beṇə' yoblə gwso'one' de'en naquə de'e güen. Na' yebale' ben Diozən' lyebe gone' to de'e gone' len lega'aque' na' goc can' bene' lyeben', nach leczə yebale' Diozən' bene' par niç bež əznia ca' cui bi gwso'one'eb lega'aque'.

³⁴ Na' leczə de'en gwso'onlilaže'e Diozən', bale' bito gwse'eye' lo'o yi'inə', na' yebale' besyə'əla catə' gwse'ene'e beṇə' so'ote' lega'aque' len spadən', na' yebale' bnežjw Diozən' lega'aque' fuers balor catə' cui bi fuers čhega'aque' gotə', na' yebale' gwsa'aque' soldad gual, na' yebale' gwso'one' gan soldad zitə' beṇə' besə'əžin gosə'ədiləlene' lega'aque'.

³⁵ Gwnitə' no'olə gwso'onlilažə' Diozən' na' laogüe de'en gwso'onlilaže'ene'enə' bosbane' no family čhega'aque' ladjo beṇə' guat ca'.

Na' gwnitə' beṇə' gwso'onlilažə' Diozən' na' bito gwse'enene' yesə'əbejyichje'ene' par yesyə'əchoje' lao de'en chəsə'əchi' chəsə'əsaquə' beṇə' lega'aque', čhedə' gwnite'e lez yolis yosban Diozən' lega'aque' ladjo beṇə' guat ca' par žjəsyə'anite'e len le'.

³⁶ Na' gwnitə' beṇə' lechgualə gosə'əzi'ichižə' beṇə' lega'aque' na' gwso'ot gosə'əyine' lega'aque' na' bos'ocheje' lega'aque' gden, na' gosə'əyixjue' lega'aque' ližya.

37 Na' beṇə' mal ca' bosə'ošiče'e balə beṇə' ca' chso'onlilažə' Diozən' yej, na' bosə'ozoxje' cuerp che yebale' len syer, na' gosə'əgo'oyele'e yebale' par yesə'əbejyichje' Diozən', pero bito gosə'əbejyichje'ene', na' gwso'ote' yebale' len spad. Na' balə beṇə' ca' gwso'onlilažə' Diozən' gwsa'aše' yixə' zjənyaze' no xa xilə' na' no xa šib. Bitobi bi gotə' chega'aque'. Lechgualē nyašə' goc chega'aque'. Na' lechgualē bosə'oči' bosə'osaquə' beṇə' lega'aque'.

38 Gosə'əlaže'e do latjə dašən' na' do ya'adao' na' do ga ze bļoj na' ga zo no liž bia yixə'. Yoguə' de'e ca' goc che beṇə' ca' gwso'onlilažə' Diozən', len la' zjəzaquə'əche' lao Diozən' cle ca yoguə' beṇə' ca' cui gwso'onlilaže'ene'enə'.

39 Na' la'aṇə'əczə bebei Diozən' yoguə' beṇə' ca' gwso'onlilažə' le', bito bene' ca gaquə yoguə'əļol de'e ca' bene' lyebe žlac gwnitə' lega'aque'.

40 Diozən' bito gone'ene' gaquə che lega'acze' de'en bene' lyebe, sino bene' par nič txen len lega'aque' bagoc checho can' bene' lyebe gaquə par nič chac yichjla'ažda'ochon' can' chene'ene'enə', na' lechgualē mbalaz can' bene'enə'.

12

Cheyalə' sotezə socho goncho xbab che Jeso'osən'

1 De'en gwso'on yoguə' beṇə' ca' gwso'onlilažə' Diozən' žlac gosə'əbane' yežlyo nga chzejni'in chio'o can' cheyalə' gonlilažə'əchone'. De'e nan' cheyalə' gwcui'ižəcho ca'alə šə bi de'en chžon par gonlilažə'əchcho Diozən', na' cuejyichjcho šə bi de'e mal de'en choncho. Na' cheyalə' co'o

gwčhejlažə'əcho len bitə'ətezə de'e chac čecho par nič sotezə socho gonlilažə'əcho Diozən' na' goncho can' ne'enə'.

² Cheyalə' sotezə socho goncho xbab če Jeso'osən' čhedə' tozə le' chonlilaže'e Diozən' cayanə'an cheyalə' gonlilažə'əchone' chio'o. Gwņeze Jeso'osən' ze'e gon Diozən' par nič soe' mbalaz len le', na' de'e na'anə' gwlo'o gwčhejlaže'e de'en gwxaquə'əzi'e catə'an gwso'ot beṇə' le' le'e yag corozən' na' be'e latjə beya' gwso'one beṇə' ca' le'. Pero na'a chi'ilene' Diozən' yoban' na' chəsə'anabi'e txen.

³ Cheyalə' goncho xbab če Jeso'osən' can' gwlo'o gwčhejlaže'e len yoguə' de'en gwso'on beṇə' mal ca' contr le' par nič co'o gwčhejlažə'əcho na' cui gaquecho zdebə goncho can' chene'e Diozən'.

⁴ Na' chio'o ža, de'e zan babžaglaecho čhedə' choncho xte ga zelao chzaque'echo par cui choncho de'e malən', pero notonoṇə' got chio'o.

⁵ Cheyalə' žjsa'alažə'əcho de que Diozən' chone' chio'o consejw can' chso'on beṇə' len xi'inga'aque'. Na' consejon' chone' chio'o nyojən nan:

Xi'indaogua'a, bito gaquele de que cui bi zejen ca de'en choṇa' castigw čhelen' catə' chonle bi de'e malən',

na' bito gaquele tolə catə' chdila' le'e, nada' naca' Xanle.

⁶ De'e na'anə' nada' chnežjua' castigw če beṇə' ca' chacda' čei catə' chso'one' de'e malən',

na' chona' par nič chəsə'əžaglae beṇə' ca' bagwcu'a ca xi'ina' catə' cui choso'ozenague' chia'.

7 De'e nan' ža, Diozən' chone' chio'o castigw chedə' chosgole' chio'o can' chso'on benachən' chosyo'osgole' xi'inga'aque'enə' bi'i chsa'aquene' chei, chso'one' castigw chega'acbo' catə' chso'ombo' de'e malən'.

8 Na' šə cui bi castigw chechon' chon Diozən' catə' choncho de'e malən', zeje dižə' de que bito naccho xi'ine', la' yoguə' chio'o bagwcue'e ca xi'ine' catə' choncho de'e malən' chone' castigw checho.

9 Xaxna'acho ca' bosyo'osgole' chio'o yežlyo nga na' gwso'one' castigw checho che bi de'e mal de'en bencho na' bzenagcho chega'aque'. Naquəchxe cheyalə' əgwzəxjw yichjchon' gwzenagcho con bin' əna Xacho Diozən' ben' chon yelə' mban zejlicane che chio'o chonlilažə'əchone'.

10 Na' xaxna'acho ca' lao to chop izən' gwso'one' castigw checho con can' gwnan chega'aque'enə'. Pero na' Diozən' chone' chio'o castigw parzə nič gaquəlene' chio'o, par nič ca' gaccho benə' la'aždao' xi'ilažə' can' naque'enə'.

11 Na' lao orən' bito chazlažə'əcho bitə'ətezə castigw de'en chaccho. Pero galj chdelə chey-acbe'icho naquən' goncho chedə' castigw de'en chaccho chaclenən chio'o par nič sotezə socho goncho de'e güennə'.

Diozən' gone' castigw checho šə cui gwzenagcho che'

12 De'e na'anə' lesotezə lesə legonlilažə' Diozən' na' le'e co'o gwchejlažə' bitə'ətezə de'en chyi' de'en chzaquə'əle.

13 Lesə legon con can' chene'e Diozən'. Legonən par nič benə' ljuežjle ca' yoso'ozenaguəche' che Diozən' caguə ca yesə'əxope' so'onche' de'e malən',

chedə' bale' cuinə' yoso'ozenague' che yoguə'əlol
de'en chene'e Diozən' so'one'.

14 Legon ga zelao saque'ele par ničh sole binlo
len yoguə' beṇə' chso'onlilažə' Jesocristən'. Na'
lecza legüe' latjə par ničh Diozən' gone' la'ažda'olen'
xi'ilažə', chedə' notono no yežin gan' zo Diozən' šə
cui naquə la'ažda'ogüe'en xi'ilažə'.

15 Bito güe'ele latjə par ničh tole cuejyichjle
cuich talenle Diozən', la' Diozən' nži'ilažə'əchgüe'
yoguə'əcho. Na' šə tole cuejyichjle Diozən', nxož
yoguə'əle gonle ca'.

16 Bito co'o xtole o cuejyichjle be'en chele o no'ol
chele par solenle beṇə' yoblə. Na' bito gue'ile
de'en naquə de'e zaque'e lao Diozən'. Nezecho
de'e Esa'on' por to yelə' guao na'azə bete'e de'en
banaquən gwnežjo Diozən' le' de'en golje' naque'
beṇə' nech.

17 Nezele de que gwdechlä gone'ene' yeyac lao
ne'e de'en bdie' lao na' beṇə' biše'enə', pero bito
goquə bi gone' par ničh yeyaquən lao ne'enə'
la'anə'əczə gwcheže' tant gone'ene' yeyaquən lao
ne'enə'.

18 Nža'alə chac che chio'o ṇa'a cle ca can' goc
che de'e xaxta'ocho ca' catə'ən Diozən' bnežjue'
lega'aque' lei che'enə'. Betje' lao ya'a Sinain' na'
gwyechj yi' bel lao ya'anə', na' gwxoan žen, na'
beyaquən žchol, na' gwyechjchgua be'.

19 Na' gwse'enene' gwchež to trompet, na' lecza
gwse'enene' be' Diozən' dižə' len lega'aque'. Pero
de'e tant besə'əžebe' xte gwsa'atə'əyoine' de'e
Moisezən' par ničh ye'e Diozən' cuich güe'elene'
lega'aque' dižə'.

20 Lechgualē besə'əžbe' por ni che de'en gož Diozən' lega'aque' antslə de que šə no beṇə' žjəbigue'e ya'anə' par yesə'əgüie' laogüen' yoso'ošiže'ene' yej, na' leczə ca' so'onene' šə bia yixə'.

21 Na' nezecho lechgualē de'e zaquə' žebchon' goquəczə lao ya'a Sinain', chedə' len de'e Moizezən' gwne': "Lechgualē chaž chžeba' can' chac."

22 Pero na'a ža chio'o banaccho txen len Diozən' ben' zo zējlicaṇe na' len yoguə' angl zan che' ca' beṇə' ca' že' yoban. Na' yoban' gwxaquə'əleben ca syoda Jerosalenṇə' na' ca ya'a Sionṇə'.

23 Na' naccho txen len yoguə'əlolte beṇə' yeziquə'əchlə beṇə' ca' leczə chəsə'ədopə chəsə'əžag chso'elaogüe'e Jesocristən', na' yoguə'əcho len lega'aque' gwxaquə'əlebecho ca to beṇə' goljə nech lao to family laogüe de'en naccho beṇə' blao lao Diozən', na' yoguə'əcho nyoj lachon' le'e libr che Diozən' de'en de yoban'. Naccho txen len Diozən' ben' əchoglaogüe'en che yoguə'əlol beṇə'chən' šə zjənaque' beṇə' güen o šə zjənaque' beṇə' mal. Leczə naccho txen len beṇə' ca' bagwsa'at, beṇə' ca' gwso'onlilažə' Cristən' lao gwnite'e yežlyon'. Diozən' babene' par ničh yichjla'aždao' lega'aque'enə' banaquən' cayaṇə'ən chene'ene' əsa'aquən'.

24 Na'a ža zocho txen len Jeso'osən' chedə' le'enə' bedəlalj xchene'ene' par ničh gwzolao chon Diozən' de'e cobə de'en none' lyebe gone' par gaquəlene' chio'o. Na' xchen Jeso'osən' de'en bedəlalje' catə'ən gwso'ote'ene' chlo'in de que Diozən' chezi'ixene' xtolə' con beṇə' chso'onlilažə' Jeso'osən'. Caguə can' naquən len xchen de'e

Abelən' de'en gwłaljən', chedə' lennə' con blo'en de que de'e malən' ben beṇə' biše'enə' bete'ene'.

²⁵ Naquən de'e žialao xen gwzenagcho che xtižə' Diozən'. Nezecho de que bnežjue' castigw che de'e xaxta'ocho ca' catə'an gwsa'aque' godenag len xtiže'enə' de'en be' de'e Moisezən' len lega'aque'. Pero gonche' castigw che chio'o šə cui gwzenagcho che xtiže'enə' de'en bedəzejni'i Xi'ine' ben' zo yoban'.

²⁶ Lechgualē gwxo' catə' Diozən' betje' yoban' par bžine' lao ya'a Sinain' gan' be'elene' beṇə' Izrael ca' dižə'anə'. Na' gwdechłə gwne': "Gwžin ža catə' yossi'inša' yežlyon' de'e yoblə, pero caguə yežlyo na'azən' sino que lenczə de'e ca' chle'icho le'e yoban'."

²⁷ Na' de'en gwne' de que yossi'inse'en de'e yoblə, zejen de que cana'achən' te che yoguə' de'e ca' ben Diozən' de'en chle'icho, ca naquə yežlyon' na' de'e ca' chle'icho le'e yoban'. Na' catə' babesyə'anit yoguə' de'e ca' chle'ichon' Diozən' ne'e zocze' chone' par ničh chac de'e güen de'e cui te chei.

²⁸ De'e na'anə' cheyalə' güe'echo yelə' choxcwlen che Diozən' ca de'en cui te che de'e mbalaz de'en chac lo'o yichjla'aždao' chio'o chonlilažə'achone'. Na' leczə güe'etecho yelə' choxcwlen che' ca de'en cui te che de'en žjəyezochō len le' zejlicane. Cheyalə' gapcho Diozən' respet na' güe'ela'ochone' can' chazlaže'enə'.

²⁹ Nezecho ca naquə yi'inə' chzeyən bitə'atezə, na' ca'aczən' chon Diozən', chone' castigw che bitə'atezə de'e mal de'en chon chio'o benəch, chedə' lechgualē chgue'ine' bitə'atezə de'e malən'.

13

De'en chazlažǎ' Diozǎn' goncho

¹ Cheyalǎ' sotezǎ socho gaquecho che yeziquǎ'ǎchlǎ beṇǎ' chso'onlilažǎ' Jesocristǎn', chedǎ' yogue'e zǎnaquǎ bišǎ'ǎcho na' zanchó.

² Cheyalǎ' əggüialaocho beṇǎ' zitǎ' ližchon' na' gonga'acchone' goclen. Balǎ xaxta'ocho ca' catǎ' bosǎ'əgüialaogüe' beṇǎ' zitǎ' na' bosǎ'əgüialaogüe' angl che Diozǎn' sin cui gwsa'acbe'ine'.

³ Cheyalǎ' gaquǎlencho beṇǎ' ljuežjcho ca' chsa'atǎ' ližya chedǎ' txenṇǎ' chžaglaolenga'acchone' šǎ bi de'e chac chega'aque'. Na' lecza ca' gaquǎlencho beṇǎ' ljuežjcho ca' šǎ no choso'oči' choso'osaquǎ' lega'aque'. Leczǎ gwžinlja žǎ či' saquǎ' chio'o zocho yežlyo nga.

⁴ Na' le'e nšagna'ale yoguǎ'ǎle lesó do lažǎ'ǎle len no'ol chele o be'en chele, can' chene'e Diozǎn', na' bitó talenle notǎ'ǎtezǎchlǎ beṇǎ'. Diozǎn' əgwnežjue' castigw che beṇǎ' ca' chǎsǎ'əgo'o xtoi, na' beṇǎ' ca' chǎsǎ'əbejyichj no'ol chega'aque' o be'en chega'aque' par chǎsǎ'ənitǎ'ǎlene' beṇǎ' yoblǎ.

⁵ Bitó cheyalǎ' selažǎ'ǎcho gaccho beṇǎ' gwni'a. Cheyalǎ' socho mbalaz len de'en de checho, chedǎ' cuin Diozǎn' bagwne' chio'o: "Bitó ganlažǎ'a le'e na' bitó cuejǎyichja' le'e."

⁶ De'e na'anǎ' bitó de de'e žebcho. Quinga guac ǎna to tocho:

Xǎna' Diozǎn' zoe' chaclene' nada'.

Na' bitó žeba' šǎ bi de'en gone beṇǎ'chǎn' nada'.

⁷ Legon xbab che beṇǎ' ca' bosó'osed bosó'olo'i le'e xtižǎ' Diozǎn', beṇǎ' ca' cuich nitǎ' na'a. Lega'aque' gosǎ'əzo gosǎ'əbeze' binlo yežlyo nga,

na' cheyalə' sole gonlilažə'əle Diozən' can' gwnitə' lega'aque' gwso'onlilažə'ətezene'.

8 Can' naquə yichjla'aždao' Jesocristən' neĵ nase, ca'aczən' naquən na'a, na' ca'aczən' gaquən zejlicane.

9 Beṇə' zan choso'osed choso'olo'ine' che Cristən' pero na' nža' xen can' choso'osed choso'olo'i bale'. Bito güe'ele latjə yesə'əxoayague' le'e len xtižə'əga'aque'enə'. Zaquə'əchən si'icho yelə' chaclen che Diozən' lo'o yichjla'ažda'ochon' par niĉ sotezə socho gonlilažə'əchone' cle ca cue' yichjcho che bi de'en chəsə'əna beṇə' cheyalə' ye'ej gaochō. De'en che'ej chaochon' bito chaclenən' yichjla'ažda'ochon'.

10 Nezecho de que Jesocristən' bagwdixjue' xtolə'əchon' le'e yag corozən'. Pero na' beṇə' ca' ne'e chso'ot bia yixə' na' choso'ozeye'eb chsa'aque'ne' par yezi'ixen Diozən' chega'aque'enə', bito chaclenən' lega'aque' ca de'en gwduxjw Jesocristən' xtolə' chio'o beṇə'ch.

11 Bxoz ca' chso'ote' bia yixə' ze tgüiz güejə chəsə'əṇabe' yezi'ixen Diozən' xtolə' yoguə' beṇə' lao nasyon chechon', na' chjgua' bxoz əblaon' chennə' lo'o quart gan' nac che Diozən', pero cuerp chega'aque'bən' choso'ozeye'en fuerlə syoda.

12 Na' can' goc che Jeso'osən', gwso'ote'ene' fuer syodan', na' yoguə' beṇə' so'onlilažə' Jeso'osən' yeyac la'ažda'oga'aque'en xi'ilažə' por ni che de'en blalj xchene'enə'.

13 De'e na'anə' cheyalə' gonlilažə'əcho Jesocristən' na' bitoch naocho de'e ca' la'aṇə'əczə šə beṇə' zan yesə'əgue'ine' chio'o de'en cuich naochon.

14 Gatə'ətezə zocho yežlyo nga, de'e te čhein', pero chbezcho yežincho yoban' na' žjəyecho syodan' de'e cui te čhei.

15 Laogüe de'en babocobə Jesocristən' yichjla'ažda'ochon' cheyalə' güe'echo yelə' choxcwlen čhe Diozən' dote tyemp na' güe'ela'ochone' len xtižə'əcho.

16 Cheyalə' sotezə socho goncho yoguə' claste de'en naquə güen na' cheyalə' əgwnežjwcho con ja'aquə' guac əgwnežjwcho par gaquəlencho beŋə' ca' cui de čhega'aque', čhedə' can' chene'e Diozən' goncho.

17 Le'e əgwzexjw yichjle na' le'e gwzenag čhe beŋə' ca' bagwlej Diozən' par choso'osed choso'olo'ine' le'e na' par čəsə'əgüia čəsə'əye' le'e. Lega'aque' chsa'aclene' le'e par nič ca' gonlilažə'əchle Diozən', na' cheyalə' yoso'odie' cuent laogüe'enə' can' chonle. Legwzenag čhega'aque' par nič yesyə'əbeine' catə' yoso'odie' cuentən' na' cui yesə'ənite'e trist. Na' šə cui gwzenagle čhega'aque' bitobi de'e güen gaquə čele.

18 Legon orasyon par neto'. Zoa' segor de que chonto' can' chazlažə' Diozən', na' chene'eto' gonto' porzə de'e güen.

19 Che'enchgüida' gonle orasyon chia' par nič yob gaquə yidəcha' gan' zolen'.

Chnabe' gaquəlen Diozən' lega'aque'

20 Laogüe de'en bnežjw cuin Xancho Jesocristən' blalj xchene'enə', chac chon Diozən' de'en none' lyebe gone' par gaquəlene' chio'o. Na' cuat əžin ža cuich gone' can' bene' lyebe gone'. Xancho

Jesocristən' gwxaquə'əlebene' ca to beṇə' goye xilə' tant nži'ilaže'e chio'o. Diozən' bolis boshane'ene' ladjo beṇə' guat ca', na' Dioz na'aczən' chone' par nič chzo chbezcho binlo len xbab de'en yo'o lo'o yichjla'ažda'ochon'.

²¹ Laogüe' nan' chona' orasyon chṇaba' əgwletje' xbab güen lo'o yichjla'ažda'olen' na' gaquəlene' le'e par nič gonle yoguə'əlol can' chene'ene' gonle. Na' chṇaba' gone' ca gombi'achle Jesocristən' par nič ca' gaquə yichjla'ažda'olen' con can' chazlažə' Diozən'. Ledoye'ela'och Jesocristən' ṇa'a na' zejlicane. Na' can' gonšgaczcho.

²² Legon xbab che yoguə' consejw quinga de'en babəṇa' le'e, chedə' bitotec bzoja' dižə' zan che to ton.

²³ Na' chyixjue'ida' le'e de que Temtion' babechoje' ližyan' na' chbeza'ane' nga. Na' šə yob yele'e nach chi'ane' catə' delaṇa'a le'e.

²⁴ Por part nada' le'e gguap diox beṇə' ca' bagwlej Diozən' par choso'osed choso'olo'ine' le'e na' par choso'ogüia choso'oye' le'e. Na' leczə ca' le'e gguap diox yoguə' noquə'əchlə beṇə' nitə' na' beṇə' bagwlej Diozən' par zjənaque' lažə' ne'enə'. Na' beṇə' ljuežjcho ca' za'ac Italian' choso'oguape' le'e diox.

²⁵ Diozən' gaquəlenšgue' le'e. De'e na'azə de'e əchnia'.

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2